

宋
史

七五

欽定四庫全書

列傳卷第八

宋史二百四十九

開寶司上稽鑑國事前書奏表纂修國史領經筵事都總裁臣曉等奉

穆

范質

子晏

兄子果

子咸信

魏仁浦

孫昭亮

王溥

父祚

范質字文素大名宗城人父守遇鄭州防禦判官質生之夕母夢神人授以五色筆九歲能屬文十三治尚書教授生徒後唐長興四年舉進士為忠武軍節度推官遷封丘令晉天福中以文章干宰相桑維翰深器之即奏爲監察御史及維翰出鎮相州歷泰寧晉

昌二節度皆請質為從事維翰再相質遷主客員外郎直史館歲餘召入為翰林學士加比部郎中知制誥契丹侵邊少帝命漢祖等十五將出征是夜質入直少帝令召諸學士分草制質曰宮城已閉恐泄機事獨具草以進辭理優贍當時稱之漢初加中書舍人戶部侍郎周祖征叛每朝廷遣使齎詔處分軍事皆合機宜周祖問誰為此辭使者以質對歎曰宰相器也周祖自鄴起兵向闕京城擾亂質匿民間物色得之喜甚時大雪解袍衣之且令草太后誥及議迎湘陰公儀注質蒼黃論撰稱旨迺白太后以質為兵

部侍郎樞密副使周廣順初加拜中書侍郎平章事
集賢殿大學士翌日兼參知樞密院事郊祀畢進位
左僕射兼門下侍郎平章事監脩國史從征高平還
加司徒弘文館大學士顯德四年夏從征壽州還加
爵邑質建議以律條繁冗輕重無據吏得因緣為奸
世宗特命詳定是為刑統六年夏世宗北征質病留
京師賜錢百萬俾市醫藥及平關南至瀛州質見于
路左師還以樞密使魏仁浦為相命質與王溥並參
知樞密院事世宗不豫入受顧命恭帝嗣位加開府
儀同三司封蕭國公及太祖北征為六師推戴自陳

橋還府署時質方就食閣中太祖入率王溥魏仁浦
就府謁見太祖對之嗚咽流涕具言擁逼之狀質等
未及對軍校羅彥瓌舉刃擬質曰我輩無主今日湏
得天子太祖叱彥瓌不退質不知所措乃與溥等降
階受命宋初加兼侍中罷參知樞密俄被疾太祖征
澤潞幸其第賜黃金器二百兩銀器千兩絹二千匹
錢二百萬太祖初即位庶事謙抑至於藩戚尚未崇
建幕府賓佐未列于位質因上奏曰自古帝王開基
創業封建子弟樹立磐維宗戚既隆杜稷永固伏見
皇弟泰寧軍節度使光義自居戎職特負將材及領

藩維尤積時望嘉州防禦使光美雄俊老成脩身樂善嘉譽日聞乞並行封冊申錫命書皇子皇女雖在襁褓者亦乞下有司許行恩制此臣之願也臣又聞為宰相者當舉賢能以輔佐天子竊以端明殿學士呂餘慶樞密副使趙普精通治道經事羈府歷歲滋深覩其公忠誠堪毗倚乞授以台司俾申才用帝嘉納之先是宰相見天子議大政事必命坐面議之從容賜茶而退唐及五代猶遵此制及質等憚帝英睿每事輒具劄子進呈具言曰如此庶盡稟承之方免妄庸之失帝從之由是奏御寢多始廢坐論之禮乾

德初帝將有事圜丘以質為大禮使質與鹵簿使張昭儀仗使劉溫叟討論舊典定南郊行禮圖上之帝尤嘉獎由是禮文始備質自為序禮畢進封魯國公質奉表固辭不允二年正月罷為太子太傅九月卒年五十四將終戒其子旻勿請謚勿刻墓碑太祖聞之為悲惋罷朝贈中書令賜絹五百匹粟麥各百石質力學強記性明悟舉進士時和凝以翰林學士典貢部覽質所試文字重之自以登第名在十三亦以其數處之貢闈中謂之傳衣鉢其後質登相位為太子太傅封魯國公皆與凝同云初質既登朝猶手不

釋卷人或勞之質曰有善相者謂我異日位宰輔誠
如其言不學何術以處之後從世宗征淮南詔令多
出其手吳中文士莫不驚伏質每下制勅未嘗破律
命刺史縣令必以戶口版籍為急朝廷遣使視民田
按獄訟皆延見為述天子憂勤之意然後遣之世宗
初征淮南駐壽濛銳意攻取且議行幸楊州質以師
老與王溥泣諫乃止及再駕揚州因事怒竇儀罪在
不測質入謁請見世宗意其救儀起避之質趨前曰
儀近臣也過小不當誅因免冠叩頭泣下曰臣備位
宰相豈可使人主暴怒致近臣於死地耶願寬儀罪

世宗意遂解復坐即遣赦儀質性卞急好面折人以廉介自持未嘗受四方饋遺前後所得祿賜多給孤遺閨門之中食不異品身沒家無餘貲太祖因論輔相謂侍臣曰朕聞范質止有居第不事生產真宰相也太宗亦嘗稱之曰宰輔中能循規矩慎名器持廉節無出質右者但欠世宗一死為可惜爾從子校書郎杲求奏遷秩質作詩曉之時人傳誦以為勸戒有集三十卷又述朱梁至周五代為通錄六十五卷行于世子旻

旻字貴參十歲能屬文以父任右千牛備身太子司

議郎累遷著作佐郎宋初為度支員外郎判大理正事俄知開封縣太宗時領京尹數召與語頗器重之嶺南平遷知邕州兼水陸轉運使俗好淫祀輕醫藥重鬼神晏下令禁之且割己奉市藥以給病者愈者千計復以方書刻石置廳壁民感化之會南漢知廣州官鄧存忠劫土人二萬衆攻州城七十餘日晏屢出親戰矢集於胸猶激勵將卒殊死戰賊遂少却病創日篤堅壁固守遣使十五輩求援廣州救兵至圍解賜璽書獎之晏病甚詔令有司以肩輿載歸闕下疾愈通判鎮州有能聲賜錢二百萬遷庫部員外郎

開寶九年知淮南轉運事太祖謂旻曰朕今委卿以
方面之重凡除民隱急軍湏之務悉以便宜從事無
庸一中覆也歲運米百餘萬石給京師當時稱有
心計太平興國初召為水部郎中錢倣獻地以旻為
考功郎中權知兩浙諸州軍事旻上言倣在國日徑
賦繁苛凡薪粒蔬菓箕帚之屬悉收斢欲盡釋不取
以蠲其弊從之車駕征晉陽上書求從召為右諫議
大夫三司副使判行在三司又兼吏部選事師還加
給事中坐受人請求擅市竹木入官為王仁瞻所發
貶房州司戶語在仁瞻傳量移唐州六年卒年四十

六有集二十卷邑管記三卷其後子貽孫上言詔復舊官貽孫官至主客員外郎

杲字師回父正青州從事杲少孤貧視如己子刻志於學與姑臧李均汾陽郭昱齊名為文深僻難曉後生多慕效之以蔭補太廟齋郎再遷國子四門博士嘗携文謁陶穀竇儀咸大稱賞謂杲曰若舉進士當待汝以甲科及秋試有上書言伐閼之家不當與寒士爭科第杲遂不應舉稍遷著作佐郎出為許鄧二州從事坐事免太平興國初遷著作郎直史館歷右拾遺左補闕雍熙二年同知貢舉俄上書自言其才

比東方朔求顯用以觀其效太宗壯之擢知制誥果
家貧貸人錢數百萬母兄晞性嗇嘗為興元少尹居
京兆殖貨鉅萬親故有自長安來者給果曰少尹不
復斬財物已揮金無筭矣果聞之喜因上言兄老求
典京兆以便養太宗從其請改工部郎中罷知制誥
果既至而晞吝如故且常以不法事干公府果大悔
果視事踰年境內不治會賊帥劉渥剽掠屬縣吏卒
解散遂驚悸成疾移知壽州上言家世史官願秉直
筆成國朝大典召為史館脩撰固末掌誥詞帝從之
時翰林學士宋白左遷鄜州賈黃中李沆參知政事

蘇易簡轉承旨果連致書相府求為學士且言於宰
相李昉曰先公嘗授以制誥一編謂果才堪此職因
出示昉昉屢開解之未幾太宗飛白書玉堂額以賜
翰林果又上玉堂記因請備職太宗惡其躁競改右
諫議大夫知濠州復召為史館脩撰初太宗以太祖
朝典策未備乃議召果果聞命喜甚以為將加優擢
晨夜趨進至宋州遇朗州通判錢熙果問以朝議將
任僕何官熙言重脩太祖實錄爾果默然久之感疾
至京師旬月卒年五十六太宗閔之錄其二子果性
虛誕與人交好面譽背非惟與柳開善更相引重始

終無間不善治生家益貧果端坐終日不知計所出人皆笑之子坦亦登進士第

王溥字齊物并州祁人父祚為郡小吏有心計從晉祖入洛掌鹽鐵案以母老解職歸漢祖鎮并門統行營兵拒契丹委祚經度芻粟即位擢為三司副使歷周為隨州刺史漢法禁牛革輦送京師遇暑雨多腐壞祚請班鎧甲之式於諸州令裁之以輸民甚便之移刺商州以奉錢募人開大秦山岩梯路行旅感其惠顯德初置華州節度以祚為刺史未幾改鎮潁州均部內租稅補實流徙以出舊籍州境舊有通商渠

距淮三百里歲久湮塞祚疏導之遂通舟楫郡無水患歷鄭州團練使宋初升宿州為防禦以祚為使課民鑿井脩火備築城北隄以禦水灾因求致政至關下拜左領軍衛上將軍致仕溥漢乾祐中舉進士甲科為秘書郎時李守貞據河中趙思綰反京兆王景崇反鳳翔周祖將兵討之辟溥為從事河中平得賊中文書多朝貴及藩鎮相交結語周祖籍其名將按之溥諫曰魑魅之形伺夜而出日月既照氛滌自消願一切焚之以安反側周祖從之師還遷太常丞從周祖鎮鄆廣順初授左諫議大夫樞密直學士二年

遷中書舍人翰林學士三年加戶部侍郎改端明殿
學士周祖疾革召學士草制以溥為中書侍郎平章
事宣制畢周祖曰吾無憂矣即日崩世宗將親征澤
潞馮道力諫止溥獨贊成之凱還加兼禮部尚書監
脩國史世宗嘗從容問溥曰漢相李崧以璣書與契
丹猶有記其詞者信有之耶溥曰崧為大臣設有此
謀肯輕示外人蓋蘇逢吉誣之耳世宗始悟詔贈其
官世宗將討秦鳳求帥於溥溥薦向拱事平世宗因
宴酌酒賜溥曰為吾擇帥成邊功者卿也從平壽春
制加階爵顯德四年丁外艱起復表四上乞終喪世

宗大怒宰相范質奏解之溥懼入謝六年夏命參知樞密院事恭帝嗣位加右僕射是冬表請脩世宗實錄遂奏史館脩撰都官郎中知制誥扈蒙右司員外郎知制誥張淡左拾遺王格直史館左拾遺董淳同加脩纂從之宋初進位司空罷參知樞密院乾德二年罷為太子太保舊制一品班於臺省之後太祖因見溥謂左右曰溥舊相當寵異之即令分臺省班於東西遂為定制五年丁內艱服闋加太子太傅開寶二年遷太子太師中謝日太祖顧左右曰溥十年作相三遷一品福履之盛近世未見其比太平興國初

封祁國公七年八月卒年六十一輟朝二日贈侍中

輟朝二日贈侍中

謚文獻溥性寬厚美風度好汲引後進其所薦至顯位者甚衆頗吝嗇祚頻領牧守能殖貨所至有田宅家累萬金溥在相位祚以宿州防禦使家居每公卿至必首謁祚置酒上壽溥朝服趨侍左右坐客不安席輒引避祚曰此豚犬爾勿煩諸君起溥諷祚求致政祚意朝廷未之許也既得請祚大罵溥曰我筋力未衰汝欲自固名位而幽囚我舉大梃將擊之親戚勸諭乃止溥好學手不釋卷嘗集蘇冕會要及崔鉉續會要補其闕漏為百卷曰唐會要又采朱梁至周

為三十卷曰五代會要有集二十卷子貽孫貽正貽
慶貽序貽正至國子博士貽慶比部郎中貽序景德
二年進士後改名貽矩至司封員外郎貽正子克明
尚太宗女鄭國長公主改名貽永令與其父同行見
外戚傳貽孫字象賢少隨周祖典商穎二州署衙內
都指揮使顯德中以父在中書改朝散大夫著作佐
郎宋初遷金部員外郎賜紫累遷右司郎中淳化中
卒太祖平吳蜀所獲文史副本分賜大臣溥好聚書
至萬餘卷貽孫遍覽之又多藏法書名畫太祖嘗問
趙普拜禮何以男子跪而婦人否普問禮官不能對

貽孫曰古詩云長跪問故夫是婦人亦跪也唐太后朝婦人始拜而不跪普問所出對云大和中有幽州從事張建章著渤海國記備言其事普大稱賞之端拱中右僕射李昉求郡省百官集議舊儀貽孫具以對事見禮志時論許其諳練云

魏仁浦字道濟衛州汲人幼孤貧母為假黃縫製暑服仁浦年十三嘆曰為人子不克供養乃使慈母求貸以衣我我能安乎因慷慨泣下辭母詣洛陽濟河沉衣中流誓曰不貴達不復渡此晉末隸樞密院為小史任職端謹齊輩不能及契丹入中原仁浦隨衆

北遷會契丹主殂于真定仁浦得脫歸魏帥杜重威
素知仁浦謹厚善書計欲留補牙職仁浦以重威降
將不願事之遂遁去重威遣騎追之不及漢祖起太
原次鞏縣仁浦迎謁道左即補舊職時周祖掌樞密
召仁浦問閼下兵數仁浦悉能記之手疏六萬人周
祖喜曰天下事不足憂也遷兵房主事從周祖鎮鄆
乾祐末隱帝用武德使李鄴等謀誅大臣楊邠史弘
肇等密詔澶帥李洪義殺騎將王殷令郭崇害周祖
洪義知事不濟與殷謀遣副使陳光穗齋詔示周祖
周祖懼召仁浦入計且示以詔曰朝廷將殺我我死

不懼獨不念麾下將士乎仁浦曰侍中握強兵臨重
鎮有功朝廷君上信讒圖害忠良雖欲割心自明奚
可得也事將奈何今詔始下外無知者莫若易詔以
盡誅將士為名激其怒心非徒自免亦可為楊史雪
冤周祖納其言倒用留守印易詔書以示諸將衆懼
且怒遂長驅渡河及即位以仁浦為樞密副承旨俄
遷右羽林將軍充承旨周祖嘗問仁浦諸州屯兵之
數及將校名氏令檢簿視之仁浦曰臣能記之遂手
疏於紙校簿無差周祖尤倚重焉廣順末太原劉崇
寇晉州仁浦居母喪而宅邇宮城周祖步登寃仁門

密遣小黃門召仁浦計事明日起復舊職周祖大漸謂世宗曰李洪義長與節鎮魏仁浦無遣違禁密世宗即位授右監門衛大將軍樞密副使從征高平周師不利東偏已潰仁浦勸世宗出陣西殊死戰遂克之師還拜檢校太保樞密使故事惟宰相生辰賜器幣鞍馬世宗特以賜仁浦從平壽春加檢校太傅進爵邑遷中書侍郎平章事集賢殿大學士兼樞密使世宗欲命仁浦為相議者以其不由科第世宗曰古人為宰相者豈盡由科第耶遂決意用之恭帝嗣位加刑部尚書宋初進位右僕射以疾在告太祖幸其

第賜黃金器二百兩錢二百萬再上表乞骸骨不許
乾德初罷守本官開寶二年春宴太祖笑謂仁浦曰
何不勸我一杯酒仁浦奉觴上壽帝密謂之曰朕欲
親征太原如何仁浦曰欲速不達惟陛下慎之宴罷
就第復賜上尊酒十石御膳羊百口從征太原中途
遇疾還至梁俟驛卒年五十九贈侍中仁浦性寬厚
接士大夫有禮務以德報怨漢乾祐中有鄭元昭者
開封浚儀人為安邑解縣兩池榷鹽使遷解州刺史
會詔以仁浦婦翁李溫玉為榷鹽使管兩池元昭不
得專其利仁浦方為樞密院主事元昭意仁浦必庇

溫王會李守真以河中叛溫王子在城中元昭即繫
溫王以變聞時周祖總樞務知其有間置而不問顯
德中仁浦為樞密使元昭不自安及代歸闕道洛都
以情告仁浦弟仁滌仁滌曰公第去可無憂我兄素
寬仁有度雖公事不欲傷於人豈念私隙乎元昭至
京師仁浦果不介意白周祖授元昭慶州刺史漢隱
帝寵作坊使賈延徽延徽與仁浦並居欲併其第屢
譖仁浦幾至不測及周祖入汴有擒延徽授仁浦者
仁浦謝曰因兵戈以報怨不忍為也力保全之當時
稱其長者世宗朝近侍有忤上至死者仁浦力救之

全活者衆淮南之役獲賊兵數千人仁浦從容上言
俾隸諸軍軍中無濫殺者景德四年其子咸信請謚
曰宣懿子咸美咸熙咸信咸美以左司禦率府率致
仕咸熙性仁孝嘗會賓客家童數輩覆按碎器客皆
驚愕咸熙色不變止令更設饌具其寬厚若此以父
任累遷屯田郎中後至太僕少卿卒年四十九子昭
慶駕部員外郎昭文西染院使昭素供奉官閤門祗
候

咸信字國寶建隆初授朝散大夫太子右坊通事舍
人改供奉官初太祖在潛邸昭憲太后嘗至仁浦第

咸信方幼侍母側儼如成人太后奇之欲結姻好開
寶中太宗尹京成昭憲之意延見咸信於便殿命與
御帶党進等較射稱善遂選尚永慶公主授右衛將
軍駙馬都尉踰年出領吉州刺史太平興國初真拜
本州防禦使四年詔用奉外賜錢十萬五年坐遣親
吏市木西邊矯制免所過稅筭罰一季奉俄遷慎州
觀察使雍熙三年冬契丹擾邊王師出討悉命諸主
壻鎮要地王承衍知大名石保吉知河陽咸信知澶
州四年本郡黃河清咸信以聞詔褒荅之籍田畢就
拜彰德軍節度八月遣歸治所淳化四年河決澶淵

陷北城再命知州事太宗親諭方略傳置而往時遣
閻承翰脩河橋咸信請及流水未下造舟為便承翰
入奏方冬難成請權罷其役咸信因其去乃集工成
之奏至上大悅河平遣還役兵俄詔留築隄咸信以
為天寒地涸無決溢之患復奏罷之真宗即位改定
國軍節度咸平中大閱東郊以為舊城內都巡檢車
駕北征為貝冀路行營都統署詔督師至貝州敵人
退召還行在所景德初從幸澶州石保吉與李繼隆
為排陣使契丹請和帝置酒行宮面賞繼隆保吉咸
信避席自愧無功上笑而撫慰之二年改武成軍節

度知曹州秋霖積潦咸信決廣濟河隄以導之民田
無害扈駕朝陵還上言先墳在洛欲立碑求泣盟津
以便其事即改知河陽大中祥符初從東封加檢校
太尉將祀汾陰命知澶州令入內副都知張繼能諭
旨移領忠武軍節度未幾召還年已昏眊見上希旨
求寵渥七年表乞任用上出示中書向敏中曰咸信
聯榮戚里位居節制復何望耶是冬以新建南京獎
太祖舊臣加同平章事俄判天雄軍天禧初改陝州
大都督府長史保平軍節度有感風疾苦歸真宗嘗
謂宰相曰咸信老病諸子不克承順身後復能保守

其家業耶未幾卒年六十九贈中書令錄其諸子孫姪遷官者七人咸信頗知書善侍士然性吝喜利仁浦所營邸舍悉擅有之既卒為諸姪所訟時人耻之子昭易昭亮昭侃昭易西京作坊使知隰州昭侃改名昭昞為崇儀使

昭亮字克明公主所生幼未名太宗召入禁中命賦賞花詩詩成上之太宗大悅酌以上尊酒命筆題從訓昭亮二名令自擇之拜如京副使遷如京洛苑使掌翰林司丁公主憂起復授六宅使領富州刺史遷內藏庫副使未幾拜西上閭門使進秩東上上言閭

門舊儀制未當乃詔龍圖閣學士陳彭年待制張知
白引進使白文肇與昭亮同加詳定既成賜白金千
兩又建議設儀石於內殿加領恩州團練使時咸信
在大名屬生日命昭亮就賜禮物是日告命至軍府
榮之父卒遷四方館使仍兼掌客省多糾群官之失
儀者昭亮多病在告詔給其奉天禧二年卒昭亮未
死日數遣人入謁求進用加兼端州防禦使未及拜
命死仍以制書賜其家贈貝州觀察使以弟昭侃為
供備庫使子餘慶為內殿崇班昭亮與陳彭年款昵
彭年嘗稱其才昭亮居官務皦察多遣人偵伺僚輩

樞密承旨尹德潤嘗少之會閣門副使焦守節內殿崇班郭盛以役卒與德潤洽第昭亮廉知發其事皆坐黜削李維即王曾妻之叔父同在翰林曾受詔試舉人以家事屬維昭亮意曾受祈請奏其竊語遣中使參問無他狀曾始得釋昭亮陰險多此類時人惡之餘慶改名成德為供備庫副使

贊曰五季至周之世宗天下將定之時也范質王溥魏仁浦世宗之所拔擢而皆有宰相之器焉宋祖受命遂為佐命元臣天之所置果非人之所能測歟質以儒者曉暢軍事及其為相廉慎守法溥刀筆家子

而好學終始不倦仁浦嘗為小史而與溥皆以寬厚長者著稱豈非絕人之資乎質臨終戒其後勿請謚立碑自悔深矣太宗評質惜其欠世宗一死嗚呼春秋之法責備賢者質可得免乎

列傳卷第八

八十五

卷八

八

正刊

列傳卷第九

宋史二百五十

開府儀同三司上贊軍國事前書石丞相監修國史領經筵事都總裁臣脫等奉

勅修

石守信

子保興
孫元孫
吉

王審琦

子承術
孫克臣等
衍

高懷德

韓重贊

子崇業
訓

張令鐸

羅彥瓌

王彥昇

石守信開封浚儀人事周祖得隸帳下廣順初累遷親衛都虞候從世宗征晉陽遇敵高平力戰遷親衛左第一軍都校師還遷鐵騎左右都校從征淮南為

先鋒下六合入渦口克楊州遂領嘉州防禦使充鐵騎控鶴四廂都指揮使從征關南為陸路副都部署以功遷殿前都虞候轉都指揮使領洪州防禦使恭帝即位加領義成軍節度太祖即位遷侍衛馬步軍副都指揮使改領歸德軍節度李筠叛守信與高懷德率前軍進討破筠衆于長平斬首三千級又敗其衆三萬于澤州獲僞河陽節度范守圖降太原援軍數千皆殺之澤潞平以功加同平章事李重進反揚州以守信為行營都部署兼知揚州行府事帝親征至大儀頓守信馳奏城破在朝夕大駕親臨一鼓可

平帝亟赴之果克其城建隆二年移鎮鄆州兼侍衛
親軍馬步軍都指揮使詔賜本州宅一區乾德初帝
因晚朝與守信等飲酒酒酣帝曰我非爾曹不及此
然吾為天子殊不若為節度使之樂吾終夕未嘗安
枕而卧守信等頓首曰今天命已定誰復敢有異心
陛下何為出此言耶帝曰人孰不欲富貴一旦有以
黃袍加汝之身雖欲不為其可得乎守信等謝曰臣
愚不及此惟陛下哀矜之帝曰人生駒過隙爾不如
多積金市田宅以遺子孫歌兒舞女以終天年君臣
之間無所猜嫌不亦善乎守信謝曰陛下念及此所

謂生死而肉骨也明日皆稱病乞解兵權帝從之皆以散官就第賞賚甚厚已而太祖欲使符彥卿管軍趙普屢諫以為彥卿名位已盛不可復委以兵權太祖不從宣已出普復懷之太祖迎謂之曰豈非符彥卿事耶對曰非也因奏他事既罷乃出彥卿宣進之太祖曰果然宣何以復在卿所普曰臣託以處分之語有侏儒者復留之惟陛下深思利害勿復悔太祖曰卿苦疑彥卿何也朕待彥卿厚彥卿豈負朕耶普對曰陛下何以能負周世宗太祖默然事遂中止開寶六年秋加守信兼侍中太平興國初加兼中書令

二年拜中書令行河南尹充西京留守三年加檢校太師四年從征范陽督前軍失律責授崇信軍節度兼中書令俄進封衛國公七年徙鎮陳州復守中書令九年卒年五十七贈尚書令追封威武郡王謚武烈守信累任節鎮專務聚斂積財鉅萬尤信奉釋氏在西京建崇德寺募民輦瓦木驅迫甚急而傭直不給人多苦之子保興保吉

保興字光裔本名保正太祖取興宗之義改之建隆初年十四以蔭補供奉官明年遷尚食副使太祖嘗召功臣子弟詢以時事保興年最少應對明白太祖

竒之拜如京使開寶中領順州刺史太宗征河東為
御砦四面都巡檢太平興國八年出為高陽關監軍
守信卒起復領本州團練使雍熙初契丹擾邊與戴
興楊守一並為澶州前軍駐泊李繼遷入鈔徙銀夏
綏府都巡檢使嘗巡按堦子砦並黑水河趣谷中夏
人知之以數千騎據險渡河求戰保興所部不滿二
千人乃分短兵伏於河滻俟其半渡急擊之斬首百
餘級追北數十里優詔褒美端拱中知平戎軍徙莫
州俄為西京都巡檢使淳化五年真拜蘄州團練使
為永興軍鈔轄改夏綏麟府州鈔轄至道二年徙延

州都巡檢使兼署州事改本路副都部署與范重召等五路討賊有岌伽羅臘數族率衆來拒保興選敢死士數百人銜枚夜擊礮之自是吳移越移諸族歸降還至烏白池賊又為方陣來拒保興麾衆出入陣中會乘馬中流矢挺身持滿易騎奮呼且行且聞凡三日四十二戰賊遂引去咸平二年知威虜軍會夏人入鈔保興發官帑錢數萬緡分給戰士主者固執不可保興曰城危如此安暇中覆事定覆而不允願以家財償之夏人退驛置以聞真宗貸而不問三年就拜棣州防禦使徙知邢州改澶州在郡頗峻刑罰

每捶人令緩施其杖移晷方畢五年以疾求歸京師
未幾卒年五十八子元孫保興世豪貴累財鉅萬悉
為季弟保從之子所廢

保吉字祐之初以蔭補天平軍衙內都指揮使開寶
四年召見賜襲衣玉帶金鞍勒馬選尚太祖第二女
延慶公主拜左衛將軍駙馬都尉俄領愛州刺史太
平興國初遷本州防禦使五年坐遣親吏市竹木秦
隴間矯制度關為王仁瞻所發罰一季奉七年改朔
州觀察使守信卒起復為威塞軍節度雍熙三年出
知河陽四年召入復命知大名府兼兵馬都部署連

改橫海安國二鎮節度真宗即位加檢校太尉保平
軍節度車駕北巡命為河北諸路行營都部署屯定
州景德初改武寧軍節度同平章事冬幸澶淵命與
李繼隆分為駕前東西面都排陣使軍于北門外遼
騎數萬驟至城下保吉不介馬而馳當其鋒遼人引
去俄而請盟錫宴射於行宮後苑帝謂繼隆等曰自
古北邊為患今其畏威服義息戰安民卿等力也保
吉進曰臣受命禦患上稟成筭至於布列行陣指授
方畧皆出於繼隆繼隆曰宣力用心躬率將士臣不
及保吉帝曰卿等協和共致太平軍旅之事朕復何

憂歡甚賜以襲衣金帶鞍勒馬二年改鎮安軍節度
未幾自治所來朝願奉朝請從之四年部民上治狀
乞還鎮所詔獎諭之仍從其請大中祥符初從東封
攝司徒封祀壇奉俎加檢校太師還鎮冬公主疾詔
歸視主薨明年保吉卒年五十七贈中書令謚莊武
保吉姿貌瓌碩頗有武幹累世將相家多財所在有
邸舍別墅雖饌品亦飾以絲繢好治生射利性尤驕
倨所至峻暴好殺待屬吏不以禮鎮大名也葉齊查
道皆知名士嘗械以運糧初程能為京西轉運保吉
託治其私負能不從至是莫子宿為屬邑吏將辱之

會有辟召乃止又染家貸錢息不盡入質其女其父上訴真宗亟命遣還嘗有僕侵盜私積不時求對懇請配隸帝曰是有常法不可保吉請不已帝戒勗之善弋獵畜鷺禽數百令官健羅鳥雀飼之人有規勸者輒怒之在陳州盛飾廄舍以迓貴主因完葺城壘疏牖于上以瞰衢路如箭窓狀未嘗上聞賓佐諫之不聽頗涉衆議初守信鎮陳五十七年卒及保吉繼是鎮壽亦止是談者異之保吉子貽孫任崇儀使帶御器械坐事免官孝孫西京左藏庫使

元孫宇善良始名慶孫避章獻太后祖諱易之以守

信蔭為東頭供奉官閣門祗候累遷如京副使仁宗即位改文思副使勾當法酒庫吏盜酒坐失察追二官復如京副使為澶州巡檢徙知莫州有治迹以禮賓使再任又徙保州領廉州刺史兼廣信安肅軍緣邊都巡檢時開屯田鑿塘水有訟元孫擅污民田者遣官按視訟者以誣服即賜白金五百兩詔褒諭之再遷西上閤門使并代州兵馬鈴轄歷侍衛親軍步軍殿前都虞候鄜延副都總管緣邊安撫使遷邕州觀察使康定初夏人寇延州元孫與戰于三州口軍敗見執傳者以為已死贈中正軍節度使兼太傅錄

其子孫七人及元昊納款縱元孫歸諫官御史奏元孫軍敗不死辱國請斬塞下賈昌朝獨言曰在春秋時晉獲楚將穀臣楚獲晉將知瑩亦還其國不誅因入對探袖出魏志于禁傳以奏曰前代將臣敗覆而還多不加罪帝乃貸元孫安置全州以升祔赦內徙襄州侍御史劉湜言元孫失軍辱命朝廷貸而不誅若例從量移無以勸用命之士元孫遂不徙後徙許州還京師卒

王審琦字仲寶其先遼西人後徙家洛陽漢乾祐初隸周祖帳下性純謹甚親任之從平李守貞以功署

廳直左番副將廣順中歷東西班行首內殿直都知
鐵騎指揮使從世宗征劉崇力戰有功遷東西班都
虞候改鐵騎都虞候轉本軍右第二軍都校世宗召
禁軍諸校宴射苑中審琦連中的世宗嘉之賞賚有
加俄領勤州刺史親征淮南舒州堅壁未下詔以郭
令圖領刺史命審琦及司超以精騎攻其城一夕拔
之擒其刺史獲鎧仗軍儲數十萬計令圖既入城審
琦等遂救黃州數日令圖為舒人所逐審琦選輕騎
銜枚夜發信宿至城下大敗舒人令圖得復還治所
世宗嘉之授散員都指揮使又破南唐軍于紫金山

先登中流矢轉控鶴右廂都校領虔州團練使世宗
圍濠州審琦率敢死士數千人拔其水砦奪月城濠
州遂降及攻楚州為南面巡檢城將陷審琦意淮人
必遁設伏待之少頃城中兵果鑿南門而潰伏兵擊
之斬數千級繫五千餘人獻于行在賜名馬玉帶錦
綵數百匹淮南平改鐵騎右廂都校又從平瓦橋關
恭帝即位遷殿前都虞候領睦州防禦使宋初擢為
殿前都指揮使領泰寧軍節度從征李筠為御營前
洞屋都部署為飛石所傷車駕臨視澤路平改領武
成軍節度李重進叛副石守信為前軍部署討之建

隆二年出為中正軍節度在鎮八年為政寬簡所部
邑令以罪停其錄事吏幕僚白令不先咨府請按之
審琦曰五代以來諸侯強橫令宰不得專縣事今天
下治平我忝守藩維而部內宰能斥去黠吏誠可嘉
爾何按之有聞者歎服開寶二年從征太原為御營
四面都巡檢三年改鎮許州賜甲第留京師太祖嘗
召審琦宴射苑中連中的賜御馬黃金鞍勒六年與
高懷德並加同平章事七年卒年五十初審琦暴疾
不能語帝親臨視及卒又幸其第哭之慟賜中書令
追封琅琊郡王贈加等葬日又為廢朝審琦重厚

有方畧尤善騎射鎮壽春歲得租課量入為出未嘗有所誅求素不能飲嘗侍宴太祖酒酣仰祝曰酒天之羨祿審琦朕布衣交也方與朕共享富貴何靳之不令飲邪祝畢顧謂審琦曰天必賜卿酒量試飲之勿憚也審琦受詔飲十杯無苦自此侍宴常引滿及歸私家即不能飲或強飲輒病子承衍承祐承祐承俊承偓承僎承僅承休承德西上閭門使會州刺史承祐至如京使承俊承僎至內殿崇班承偓至閣門祗候承僅至左神武將軍致仕承休至內殿承

制

承衍字希甫幼端謹審琦鎮充海壽春皆署以牙職
開寶初補內殿供奉官都知三年尚太祖女昭慶公
主授右衛將軍駙馬都尉仍充都知踰年領恩州刺
史加本州防禦使太平興國初遷應州觀察使二年
春太宗幸其第賜宴承衍以金器名馬為壽詔賜銀
萬兩錦綵五千匹三年加檢校太保坐市竹木奏隴
矯制免稅筭罰一季奉七年授彰國軍節度雍熙中
出知天雄軍府兼都部署時契丹擾鎮陽候騎至冀
州去魏二百餘里鄰境戒嚴城中大恐屬上元節承
衍下令市中及佛寺然燈設樂與賓佐宴遊達旦人

賴以安明年召還復為貝冀都部署端拱初換永清
軍節度每知天雄軍吏民千餘詣監軍請為本道節
帥詔褒之真宗即位改河中尹護國軍節度加檢校
太尉咸平六年以疾求罷節鉞三抗表不許帝自臨
問至卧內慰勉久之賜予甚厚擇尚醫數人迭宿其
第卒年五十二車駕親臨贈中書令給鹵簿葬謚恭
肅其後公主請置守冢五戶從之承衍善騎射曉音
律頗涉學藝好吟咏以功臣子尚主貴顯擁富貲自
奉甚厚子世安世隆世雄世融世安至崇儀副使通

事舍人世隆字本支以公主子為如京副使歷洛苑

六宅二使領平州刺史性驕恣每坐諸叔之上人皆嗤之景德初卒特贈泰州防禦使召見其三子賜名克基克緒克忠皆面授供奉官世祖至內殿崇班世融為內殿承制世安子克正殿中丞克基克忠並為西染院副使兼閣門通事舍人克緒至內殿承制世隆幼子克明為西上閣門副使

承衍字希悅開寶中授閑廄使面賜紫袍金帶纔十二歲太平興國中出監徐州軍又為西京水南巡檢使改如京使表求治郡自效命知潭州遷六宅使領昭州刺史俄知澶州加莊宅使咸平中兩賜川峽傳

詔慰撫官吏經略蠻洞連知延代并三州皆兼兵馬
鈐轄改尚食使鳳翔張雍病命承衍代之徙涇州授
西上閭門使改領永州刺史景德中真宗以天水近
邊蕃漢雜處擇守臣撫治擢承衍知秦州徙知天雄
軍大中祥符初進秩東上閭門使承衍病足在大名
不能騎政多廢弛及代賜告家居表求解職不允以
久不朝請求近郡改左武衛大將軍知壽州二年卒
年四十九詔遣其弟承僎馳往護喪承衍頗涉學喜
為詩所至為一集曉音律多與士大夫遊意豁如也
初審琦鎮壽春生于郡廨至卒亦於其地人咸

異之子世京為閣門祗候世文內殿崇班

克臣字子難祖承衍尚秦國賢穆公主克臣第景祐進士仁宗閱其文顧侍臣曰賢穆有孫登科可喜也仕累通判壽州鼓角卒夜入州廨擊郡將既就擒而監兵使所部被甲操刃立庭中官吏駭觀克臣徐言曰此不過為盜耳立遣甲者去戒光卒勿妄引他人衆謹服是日天貺節率掾屬朝謁如常儀人賴以安猶坐貶監潭州稅熙寧中為開封度支二判官遷鹽鐵副使時鄭俠以上書竄嶺表克臣嘗薦俠且餽之白金又坐奪官復為戶部副使以集賢殿脩撰知鄆

州京東多盜克臣請以便宜處決遂下諸郡使械送
尤桀者斬以徇盜為少衰河決曹村克臣亟築隄城
下或曰河決澶淵去鄆為遠且州徙於高八十年不
知有水患安事此克臣不聽役愈急隄成水大至不
沒者才尺餘復起甬道屬之東平王陵埽人得趨以
避水事寧皆繪像祀之進天章閣待制徙知瀛州有
告外間入境密旨趣具獄株連甚衆克臣陰緩之已
而得為間者於他道徙知太原王中正西討罔功而
誣克臣姑息士卒使無固志黜為單州明年拜工部
侍郎至是神宗幸尚書省至部舍止輦獎其治力以

為雖少者不及顧其子駙馬都尉師約使入覲元祐
四年以龍圖閣直學士太中大夫卒年七十六
師約字君授少習進士業英宗欲求儒生為主婿命
宰相召克臣諭旨令師約持所為文至第明日獻賦
一編即坐中賦大人繼明詩遂賜對選為駙馬都尉
尚徐國公主授左衛將軍面賜玉帶又賜九經筆硯
勉之進學神宗即位拜嘉州刺史遷成州團練使國
朝故事主婿未嘗居職帝始令師約同管當三班院
試其才明年主就館乃罷遷汝州防禦使始制駙馬
都尉七年考績法轉晉州觀察使哲宗立遷鎮安軍

節度觀察留後宣仁后臨朝師約屢上書言事元符
初議者以為職不當上言褫其秩徽宗即位乃復保
平軍留後又為樞密都承旨未幾復罷崇寧元年卒
年五十九師約善射嘗陪遼使燕射玉津園一發中
鵠發必破的屢受金帶及鞍勒馬之賜子殊主所生
至閩州觀察使

高懷德字藏用真定常山人周天平節度齊王行周
之子懷德忠厚倜儻有武勇行周歷延潞二鎮及留
守洛都節制宋毫皆署以牙職晉開運初遼人侵邊
以行周為北面前軍都部署懷德始冠自行周願從

北征行周壯之許其行至戚城遇遼軍被圍數重援兵不至危甚懷德左右射縱橫馳突衆皆披靡挾父而出以功領羅州刺史賜珍裘寶帶名馬以寵異之及行周移鎮鄆州改集州刺史仍領牙校又遷信州刺史從行周再鎮宋州晉末契丹南侵以行周為邢趙路都部署禦之留懷德守睢陽會杜重威降契丹京東諸州群盜大起懷德堅壁清野敵不能入行周率兵歸鎮敵遂解去漢初行周移鎮魏博及再領天平以懷德為忠州刺史領職如故周祖征慕容彥超還過汝上寵賜行周甚厚并賜懷德衣帶綠繒鞍勒

馬行周卒召懷德為東西班都指揮使領吉州刺史
改鐵騎都指揮使太原劉崇入寇世宗討之以懷德
為先鋒都虞侯高平克捷以功遷鐵騎右廂都指揮
使領果州團練使從征淮南知廬州行府事充招安
使戰廬州城下斬首七百餘級尋遷龍捷左廂都指
揮使領岳州防禦使賜駿馬七匹南唐將劉仁瞻據
壽春舒元據紫金山置連珠砦為援以抗周師世宗
命懷德率帳下親信數十騎覘其營壘懷德夜涉淮
遲明賊始覺來戰懷德以少擊衆擒其裨將以還盡
偵知其形勢強弱以白世宗世宗大喜賜襲衣金帶

器幣銀鞍勒馬世宗一日因按轡淮壩以觀賊勢見一將追擊賊衆奪槊以還令左右問之乃懷德也召至行在慰勞許以節鉞世宗北征命與韓通率兵先抵滄州初得關南又命副陳思讓為雄州兵馬都部署克瓦橋關降姚內斌以歸恭帝嗣位擢為侍衛馬軍都指揮使領江寧軍節度又為北面行營馬軍都指揮使太祖即位拜殿前副都點檢移鎮滑州充關南副都部署尚宣祖女燕國長公主加駙馬都尉李筠叛上黨帝將親征先令懷德率所部與石守信進攻破筠衆於澤州南事平以功遷忠武軍節度檢校

太尉從平楊州建隆二年改歸德軍節度開寶六年
秋加同平章事冬長公主薨去駙馬都尉號太宗即
位加兼侍中又加檢校太師太平興國三年春被病
詔太醫王元佑道士馬志就第療之四年從平太原
改鎮曹州封冀國公七年改武勝軍節度是年七月
卒年五十七贈中書令追封渤海郡王謚武穆懷德
將家子練習戎事不喜讀書性簡率不拘小節善音
律自為新聲度曲極精妙好射獵嘗三五日露宿野
次獲狐兔累數百或對客不揖而起由別門引數十
騎從禽於郊子處恭歷莊宅使至右監門衛大將軍

致仕處俊至西京作坊使

韓重贊磁州武安人少以武勇隸周太祖麾下廣順初補左班殿直副都知從世宗戰高平以功遷鐵騎指揮使從征淮南先登中流矢轉都虞候俄遷控鶴軍都指揮使領虔州刺史宋初以翊戴功擢為龍捷左廂都校領永州防禦使從征澤潞還命代張光翰為侍衛馬步軍都指揮使領江寧軍節度討李重進為行營馬步軍都虞候建隆二年改殿前都指揮使領義成軍節度三年發京畿丁壯數千築皇城東北隅且令有司繪洛陽宮殿按圖脩之命重贊董其役

乾德三年秋河決澶州命重贊督丁壯數十萬塞之
四年太祖郊祀以爲儀仗都部署時有譖重贊私取
親兵爲腹心者太祖怒欲誅之趙普諫曰親兵陛下
必不自將湏擇人付之若重贊以謠誅即人人懼罪
誰復爲陛下將親兵者太祖納其言重贊得不誅後
聞普嘗救己即詣普謝普拒不見五年二月出爲彰
德軍節度開寶二年太祖征太原過其郡重贊迎謁
於王橋頤召赴燕飲帝曰契丹知我是行必率衆來
援彼意鎮定無備必由此路入卿爲我領兵倍道兼
行出其不意破之必矣乃命爲北面都部署重贊令

軍士銜枚夜發果遇契丹兵于定州見重贊旗幟大駭欲引去重贊乘之大破其衆獲馬數百匹太祖大喜優詔褒美七年卒贈侍中重贊信奉釋氏在安陽六七年課民採木為寺郡內苦之子崇訓崇業重贊與張光翰趙彥徽分領諸軍節度嘉其翊戴功也光翰後唐山南節度使虔釗兄子及卒贈侍中彥徽真定安喜人與太祖同事世宗太祖兄事之及卒贈侍中

崇訓字知禮乾德中以蔭補供奉官遷西京作坊副使出為澶州河南北都巡檢使從太宗征河東還以

貝冀等州都巡檢使權知麟州雍熙中李繼遷寇夏
州崇訓領兵赴援大敗之徙監夏州軍歷知越泉登
莫四州徙知威虜軍改如京使咸平初出知石州屬
繼遷犯境崇訓追襲之至賀蘭山而還二年再知麟
州又敗繼遷於城下崇訓由河西徙閩越再移北邊
凡二十五年以勞擢西上閣門使邠寧環慶清遠軍
都巡檢使徙鎮定高陽關行營鈴轄屯鎮州兼河北
都轉運使事契丹兵至方順河將寇威虜軍崇訓陳
兵唐河折其要路敵遣別騎寇赤堠驛崇訓分兵擒
戮之既而值霖雨敵兵飢乏不敢進遂遁去移并代

鉉轄權知并州從部署張進領兵由土門會大將王超襲破契丹于定州六年授四方館使樞密都承旨又命為鎮定高陽馬步軍都鉉轄屯定州景德初契丹入寇至唐河崇訓陳兵河南翌日又與王超追襲至鎮州既而都部署桑贊逗留不進崇訓帥兵獨往時車駕幸澶州召崇訓乃還三年春拜檢校太傅大中祥符二年授右龍武軍大將軍領詔防禦使以本官分司西京卒年五十六崇訓為人長厚謙畏未嘗忤物子允恭禮賓副使有謀略好學人以為能世其家云

崇業字繼源以蔭補供奉官選尚秦王廷羨女雲陽
公主授左監門衛將軍駙馬都尉廷羨得罪降為右
千牛衛率府率分司西京俄削秩去駙馬之號從貶
房陵廷羨卒起為靜難軍行軍司馬雍熙三年授寧
州刺史公主卒葬州境真宗初始得入朝咸平四年
改左屯衛大將軍領高州團練使追封公主為號國
長公主五年十月卒年四十一子允升為內殿承制
閻門祗候

張令鐸棣州兗次人少以勇力隸軍伍後唐清泰中
補寧衛小校晉初改隸奉國軍漢乾祐中從周太祖

平河中以功遷奉國軍指揮使廣順初遷控鶴指揮
使累遷本軍左廂都指揮使領虔州團練使從世宗
征淮南移領虎捷左廂加常州防禦使再征壽春命
與龍捷右廂柴貴分為京城左右廂巡檢世宗將北
征命與韓通高懷德領兵先赴滄州又副韓令坤為
霸州部署率兵戍守恭帝即位授侍衛親軍步軍都
指揮使領武信軍節度使令鐸本名鐸以與河中張
鐸同姓名故賜今名宋初遷馬步軍都虞候領陳州
節制太祖征李筠以令鐸為東京舊城內都巡檢建
隆二年出為鎮寧軍節度帝為皇弟興元尹光美娶

其第三女開寶二年來朝被病車駕臨問賜帛五千
匹銀五十兩并賜其家人甚厚明年春卒於京師年
六十帝甚悲悼贈侍中令鐸性仁恕嘗語人曰我從
軍三十年大小四十餘戰多摧堅陷敵未嘗妄殺一
人及卒人多惜之子守正至內園使守恩淳化中累
至崇儀副使稍遷崇儀使領綿州刺史景德初知原
州就加西上閣門使知泰州卒錄其子奉禮郎永安
為大理評事後至殿中丞

羅彥瓌并州太原人父全德晉汾州刺史彥瓌得補
內殿直少帝在澶州欲命使宣慰大名府時河北契
丹

丹騎充斥遂募軍中驍勇士十人從行彥瓌備選銜
枚夜發往返如期繇是補興順指揮使開運末契丹
主至汴遣彥瓌送廄馬十匹赴幽薊彥瓌至元氏聞
漢祖建號太原以駕歸漢漢祖嘉之及入汴擢為護
聖指揮使周初遷散員都虞候坐樞密使王浚黨出
為鄧州教練使世宗嗣位召為伴飲指揮使改馬步
軍都軍頭從向訓收秦鳳有功遷散指揮都虞候顯
德末太祖自陳橋入歸公署見宰相范質等未及言
彥瓌挺劍而前曰我輩無主今日湏得天子質等由
是降階聽命擢為控鶴左廂都指揮使改內外馬軍

都軍頭領眉州防禦使從平澤潞還命代趙彥徽為
侍衛步軍都指揮使領武信軍節度建隆二年出為
彰德軍節度乾德二年改安國軍節度與昭義軍節
度李繼勲大破契丹四年春又與閻門使田欽祚殺
太原軍千餘人于靜陽禽其將鹿英等獲馬三百匹
明年移鎮華州開寶二年卒年四十七

王彥昇字光烈性殘忍多力善擊劍號王劍兒本蜀
人後唐同光中蜀平徙家洛陽初事宦官驃騎大將
軍孟漢瓊漢瓊以其趨勇言於明宗補東班承旨晉
天福中轉內殿直開運初契丹圍大名少帝幸澶淵

募勇敢士齎詔納城中彥昇與羅彥瓌應之一夕突
圍而入以功遷護聖指揮使周廣順中從向拱破太
原兵虎亭南斬敵帥王璋於陣以功遷龍捷右第九
軍都虞候累轉鐵騎右第二軍都校領合州刺史世
宗征淮南從劉崇進宋偓破金牛水砦禽僞軍校閻
承旺范橫又從李重進扞吳兵于盛唐斬二千餘級
又從張永德攻瀛州下東城改散員都指揮使太祖
北征至陳橋為衆推戴彥昇以所部先入京遇韓通
於路逐至第殺之初太祖誓軍入京不得有殺毫犯
及聞通死意甚不樂以建國之始不及罪彥昇拜恩

州團練使領鐵騎左廂都指揮使後為京城巡檢中
夜詣王溥第溥驚悸而出既坐乃曰此夕巡警甚困
聊就公一醉耳彥昇意在求賄溥佯不悟置酒數行
而罷翌日溥密奏其事乃出為唐州刺史乾德初遷
申州團練使開寶二年改防州防禦使是冬又移原
州西人有犯漢法者彥昇不加刑召僚屬飲宴引所
犯以手猝斷其耳大嚼卮酒下之其人流血被體股
慄不敢動前後唱者數百人西人畏之不敢犯塞七
年以病代還次乾州卒年五十八太祖以其專殺韓
通終身不授節鉞

論曰石守信而下皆顯德舊臣太祖開懷信任獲其忠力一日以黃袍之喻使自解其兵柄以保其富貴以遺其子孫漢光武之於功臣豈過是哉然守信之貨殖鉅萬懷德之馳逐敗度豈非亦因以自晦者邪至於審琦之政成下蔡重贊之功宣廣陵卓乎可稱令鐸身四十餘戰未嘗妄殺可謂勇者之仁矣彥瓌於革命之日首挺劒以語范質於宋則未必功在衆先於周則其過不在人后矣王彥昇殺韓通太祖雖不加罪而終身不授節鉞是足垂訓後人矣保吉承衍咸以帝婿致位藩鎮其被驅策著戎功則保吉為

優況推功李繼隆尤為不伐而有讓然械役名士縱
意禽荒累德多矣

列傳卷第九

列傳卷第十

宋史二百五十一

開府儀同三司上柱國錄軍國重事前書奏丞相監修國史領經筵事都總裁居脫脫等奉

勅修

韓令坤

父倫

慕容延釗

子德豐
從子德琛

符彥卿

子昭惠

韓令坤磁州武安人父倫少以勇敢隸成德軍兵籍累遷徐州下邳鎮將兼守禦指揮使世宗以令坤貴擢陳州行軍司馬及令坤領陳州徙倫許州罷職復居宛丘多以不法干郡政私酷求市利掊斂民財公私患之項城民武郁詣闈訴其事命殿中侍御史率

欒按之倫詐報欒云被詔赴關欒奏之世宗怒追劾
具伏法當棄市令坤泣請於世宗遂免死流海島顯
德六年為左驍衛中郎將遷左監門衛將軍宋初拜
磁州刺史轉亳州團練使乾德四年改本州防禦使
卒今坤少隸周祖帳下廣順初歷鐵騎散員都虞候
控鶴右第一軍都校領和州刺史世宗即位授殿前
都虞候俄賞高平之功為龍捷左廂都虞候領容州
團練使進本廂都指揮使領泗州防禦使征太原為
行營前軍馬軍都校未幾為侍衛馬軍都指揮使領
定武軍節度世宗命宰相李穀將兵征淮南俾令坤

等十二將以從毅退保正陽為吳人所乘令坤與宣
祖李重進合兵擊之大敗吳人世宗親征聞揚州無
備遣令坤及宣祖白延遇趙晁等襲之令坤先令延
遇以精騎數百逕明馳入城中不之覺令坤繼至撫
之民皆按堵南唐東都副留守馬延魯為僧匿寺中
令坤求獲之送行在遂以令坤知州事由是泰州懼
以城降時錢倣受詔攻常潤圍毗陵反為南唐所敗
南唐乘勝遣將陸孟俊逼泰州周師不能守孟俊遂
進軍蜀岡逼揚州令坤棄其城世宗怒命太祖與張
永德領兵趨六合援之令坤聞援至復入城守與孟

俊兵戰大敗之擒孟俊敗其將馬貴于楚州灣頭堰
擒連州刺史秦進崇俄命向拱為緣江招討使以令
坤副之下壽州歸朝加檢校太尉領鎮安軍節度使
世宗乃復幸淮右次楚州遣令坤率兵先入揚州命
權知軍府事揚州城為吳人所毀詔發丁壯別築新
城命令坤為修城都部署六年春命令坤以汴亳民
導汴水入于蔡三月世宗將北征命率龍捷虎捷驍
武兵先赴大名又副王晏為益津關一路都部署俄
為霸州都部署率所部兵戍之恭帝即位加檢校太
尉侍衛馬步軍都虞侯冬詔防北邊宋初移領天平

軍加侍衛馬步軍都指揮使同平章事太祖親征李筠詔令坤率兵屯河陽及澤潞平還京錫宴令坤等于禮賢講武殿賜襲衣器幣鞍勒馬有差以功加無
侍中又從討李重進建隆二年改成德軍節度充北面緣邊兵馬都部署將赴鎮上於別殿置酒餞之因勗其為治乾德六年疽發背卒年四十六太祖素服發哀于講武殿錄其子慶朝為閑廄使慶雄為閑廄副使令坤有才略識治道與太祖同事周室情好親密鎮常山凡七年北邊以寧聞其卒甚悼惜之初南唐遣邊鎬破湖南以馬希崇分司楊州及令坤克取

之希崇以妓楊氏獻令坤甚嬖之會擒陸孟俊將械送行在所楊氏於簾間窺見之即拊膺慟哭令坤怪問之楊氏曰孟俊徃年入潭州殺我家二百口惟妾為希崇所匿得免願甘心焉令坤以詰孟俊孟俊具伏令坤乃殺之

慕容延釗太原人父章襄州馬步軍都校領開州刺史延釗少以勇幹聞漢祖之興也周祖為其佐命以延釗隸帳下周廣順初補西頭供奉官歷尚食副使鐵騎都虞侯世宗即位為殿前散指揮使都校領溪州刺史高平之戰督左先鋒以功授虎捷左廂都指

揮使領本州團練使遷殿前都虞候領睦州防禦使
從征淮南改龍捷左廂都校沿江馬軍都部署歸朝
復為殿前都虞候出為鎮淮軍都部署顯德五年世
宗在迎鑾江口聞吳人舟數百艘泊東沛洲即命延
釗與左神武統軍宋延峯討之延釗以驍騎由陸進
延峯督舟師沿江繼進大破之淮南平遷殿前副都
指揮使領淮南節度恭帝即位改鎮寧軍節度充殿
前副都點檢復為北面行營馬步軍都虞候太祖即
位延釗方握重兵屯真定帝遣使諭旨許以便宜從
事延釗與韓令坤率所部兵按治邊境以鎮靜聞太

祖嘉之加殿前都點檢同中書門下三品避其父名故也李筠叛初命與王全斌由東路會兵進討俄為行營都部署知潞州行府事及平加兼侍中詔還澶州建隆二年長春節來朝賜宅一區表解軍職徙為山南東道節度西南面兵馬都部署是冬大寒遣中使賜貂裘百子瓊帳四年春命師南征以延釗為湖南道行營前軍都部署時延釗被病詔令肩輿即戎事賊將汪端與衆數千擾朗州延釗擒之磔于市荆湘既平加檢校太尉是冬卒年五十一初延釗與太祖友善顯德末太祖任殿前都點檢延釗為副常兄

事延釗及即位每遣使勞問猶以兄呼之洎寢疾御
封藥以賜聞其卒慟哭久之贈中書令追封河南郡
王錄其子弟授官者四人子德業德豐德鈞德業至
衛州刺史德鈞至尚食副使延釗弟延忠歷內殿直
供奉西頭官都知至磁州刺史延卿至虎捷軍都指
揮使延卿子德琛

德豐字日新幼聰悟延釗愛之嘗曰興吾門者必此
子八歲補山南東道衙內指揮使延釗卒授如京使
開寶中從征太原領御砦南面巡檢又為揚州都監
征南唐為洞子都監城既下命為昇州都監市墨安

靜澤國富饒使者多裒聚金帛德豐獨以廉潔聞俄
領蔚州刺史太平興國二年知慶州兼邠寧都巡檢
嘗破小遇族奪名馬數十匹詔書褒諭居任九年以
簡靜為治邊鎮安之雍熙四年使登萊閱強壯及還
拜西上閭門使是冬出為定遠軍鉅轄命領後陣中
隊別將萬騎以禦邊害淳化二年進秩東上知邢州
三年改判四方館事出知延州時侯延廣知靈武或
言其得西夏情偪強難制命德豐代之就賜白金三
千兩會建使名改為四方館使未幾以所部不治徙
知慶州俄又改靈州兼部署穀價湧貴德豐出私廩

賑饑民全活者衆轉引進使賊入境德豐率兵擊走獲羊馬甚衆咸平二年遷客省使知鎮州召對便坐撫慰甚至是冬遼人南侵德豐繕兵固守餉餽不絕詔獎之三年改滄州德豐輕財好施厚享將士在西邊時母留京師妻孥寓長安貧甚真宗憫之特詔給團練使奉踰年進潁州團練使知貝瀛二州五年卒年五十五家無餘財談者善之子惟素至殿內承制德琛以延釗蔭補供奉官累遷內殿崇班知夔州李順之亂賊酋張餘領衆十萬餘舟千艘來寇與順戰龍山斬首千餘級又與白繼贊擊賊斬二萬餘級焚

其舟賊剽開州圍雲安德琛往援之又斬百餘級累
詔褒諭歷西京作坊左藏二副使咸平二年轉崇儀
副使荆湖北路鉅轄蠻擾澧鼎境上德琛戰於北
擒耕牛鎧甲斬馘以歸徙峽路鉅轄未至復知瓊州
景德中領梧州刺史復任峽路再遷莊宅使又為并
代鉅轄知憲州天禧初改右監門衛大將軍

符彥卿字冠侯陳州宛丘人父存審後唐宣武軍節
度蕃漢馬步軍都總管兼中書令彥卿年十三能騎
射事莊宗於太原以謹忍稱出入卧內及長以為親
從指揮使入汴遷散員指揮使郭從謙之亂莊宗左

右皆引去惟彥卿力戰射殺十數人俄矢集乘輿遂
慟哭而去天成三年以龍武都虞候吉州刺史討王
都于定州大破契丹于嘉山明年克其城授耀州團
練使改慶州刺史奉詔築堡方渠北烏崙山口以招
黨項清泰初改易州兼領北面騎軍賜戎服介胄戰
馬嘗射獵遂城鹽臺淀一日射斃羆狼兔四十二
觀者神之晉天福初授同州節度兄彥饒亦鎮滑臺
俄而彥饒叛彥卿上表待罪乞歸田里晉祖釋不問
改左羽林統軍俄兼領右羽林改鎮鄜延少帝幼與
彥卿狎即位召還出鎮河陽三城遼人南侵詔彥卿

率所部拒戰澶淵契丹騎兵數萬圍高行周于鐵丘
諸將莫敢當其鋒彥卿獨引數百騎擊之遼人遁去
行周得免又副李守真討平青州楊光遠移鎮許州
封祈國公開運二年與杜重威李守真經略北鄙契
丹主率衆十餘萬圍晉師于陽城軍中乏水鑿井輒
壞爭絞泥吮之人馬多渴死時晉師居下風將戰弓
弩莫施彥卿謂張彥澤皇甫遇曰與其束手就擒曷
若死戰然未必死彥澤等然之遂潛兵尾其後順風
擊之契丹大敗其主乘橐駝以遁獲其器甲旗仗數
萬以歸必帝嘉之改武寧軍節度同平章事為左右

所間會再出師河朔彥卿不預易其行伍配以羸師
數千戍荊州口及杜重威以大軍降於滹水急詔彥
卿與高行周領禁兵屯澶淵會彥澤引遼兵入汴彥
卿與行周遂歸遼遼主以陽城之敗詰彥卿彥卿對
曰臣事晉王不敢愛死今日之事死生唯命遼主笑
而釋之會徐宋寇盜蠭起遼主即遣彥卿歸鎮行次
角橋賊魁李仁恕擁衆數萬攻徐州彥卿領數十騎
遽至城下仁恕遣其徒執彥卿馬請隨入城俄頃彥
卿子昭序自城中遣軍校陳守習縋而出大呼賊中
曰相公當為國討賊何故自入虎口乃助賊攻城我

雖父子今為仇敵當死戰城不可入賊惶愧羅拜彥卿前乞免罪彥卿為設誓乃解去漢祖入汴彥卿自徐州來朝改鎮兗州加兼侍中乾祐中加兼中書令封魏國公拜守太保移鎮青州及殺楊邠輩召促赴闕下周祖即位封淮陽王劉銖誅以其京城第宅賜彥卿及征兗州彥卿朝行在獻馬及錦綵軍糧萬石連被賜賚俄移鎮鄆州會召魏府王殷欲以彥卿代鎮俄遼人起兵留殷控扼故彥卿不入朝殷得罪即以彥卿為大名尹天雄軍節度進封衛王世宗初并人擾潞州潞兵敗命彥卿領兵從磁州固鎮路壓其

背及帝親征命為行營一行都部署兼知太原行府
事領步騎二萬進討初彥卿之行也世宗以弁人雖
敗朝廷饋運不繼未議攻擊且令觀兵城下徐圖進
取及周師入境汾晉吏民望風欵接皆以久罹虐政
願輸軍湏以資兵力世宗從之而連下數州彥卿等
皆以芻糧未備欲旋軍世宗不之省乃調山東近郡
輓軍食濟之及世宗至城下命與郭從義向訓白重
贊史彥超率萬騎屯忻口以拒北援又下盂縣遼人
駐忻北遊騎及近郊史彥超以二千騎當其鋒左右
馳擊彥超死之敗遼衆二千餘遼騎遁走先鋒為遼

人所掩重傷數百人諸將論議矛盾師故不振世宗
乃班師數賜彥卿繒綵鞍勒馬遣歸本鎮還京拜彥
卿太傅改封魏王恭帝即位加守太尉太祖即位加
守太師建隆四年春來朝賜襲衣玉帶宴射于金鳳
園太祖七發皆中的彥卿貢名馬稱賀開寶二年六
月移鳳翔節度被病肩輿赴鎮至西京上言疾亟請
就醫洛陽從之假滿百日猶請其奉為御史所劾下
留司御史臺太祖以姻舊特免推鞫止罷其節制八
年六月卒年七十八喪事官給彥卿將家子勇略有
謀善用兵有審之第四子軍中謂之符第四前後賞

賜鉅萬悉分給帳下故士卒樂為効死遼人自陽城
之敗尤畏彥卿或馬病不飲餽必唾而呴曰此中豈
有符王邪晉少主既陷契丹德光之母問左右曰彥
卿安在或對曰聞其已遣歸徐州矣德光母曰留此
人中原何失策之甚其威名如此鎮大名餘十年政
委牙校劉思遇思遇貪黠怙勢斂貨財公府之利多
入其家彥卿不之覺時藩鎮率遣親吏受民租槩量
增溢公取其餘羨而魏郡尤甚太祖聞之遣常參官
主其事由是斛量始平詔以羨餘粟賜彥卿以愧其
心彥卿酷好鷹犬吏卒有過求名鷹犬以獻雖盛怒

必貰之性不飲酒頗謙恭下士對賓客終日談笑不及世務不伐戰功居洛陽七八年每春月乘小駟從家僮一二遊僧寺名園優游自適周世宗宣懿皇后太宗懿德皇后皆彥卿女也自恭帝及太祖兩朝賜詔書不名子昭信昭惲昭壽昭信天雄軍衙內都指揮使領賀州刺史周顯德初卒贈檢校太保閻州防禦使

昭惲字致恭謹厚謙約頗讀書好事周廣順中以蔭補天雄軍牙職俄領興州刺史開寶中改領恩州彥卿養疾居洛入補供奉官四年改領羅州刺史七年

遷西京作坊副使俄授尚食使出護陳許蔡穎等州
巡兵從征太原為御營四面巡檢使及攻幽州命與
定國軍節度宋偓率兵萬餘置砦城南師還真拜蔡
州刺史知并瀆二州不踰月復移并門兼副部署丁
內艱起復為本州團練使連知永興軍梓滑二州咸
平初又為天雄軍邢州二鈐轄三年以疾求歸京師
詔遣中使尚醫馳傳診視既還帝賜以名方御藥拜
本州防禦使四年卒年五十七車駕臨哭贈鎮東軍
節度子承煦為左千牛衛將軍

昭壽初補供奉官開寶七年改西京作坊副使歷遷

六宅副使領蘭州刺史雍熙二年冬命與劉知信護
鎮州屯兵會遣將北征又與知信為押隊都監轉尚
食使真拜光州刺史端拱二年知洪州淳化四年改
定州咸平初遷鳳州團練使益州鉅轄昭壽以貴家
子日事遊宴簡倨自恣常紗帽素斃衣偃息後圃不
理戎務有所裁決即令家人傳道多集錦工就解舍
織纖麗綺帛每有所湏取給於市餘半歲方給其直
又令部曲私邀取之廣糴黍稻未及成熟者亦取之
悉貯寺觀中久之損敗即勒道釋償之縱其下凌忽
軍校劍南自李順平後人心洶洶知州牛冕緩弛無

政昭壽又不能御軍人皆怨憤神衛卒趙延順等
人謀欲害昭壽未敢發三年正旦中使自峨眉山還
京昭壽戒馭吏具鞍馬將送之延順等悉解廄中馬
韁奔逸庭下陽逐誼呼登廳執昭壽殺之并殺二僕
據甲仗庫取兵器都監王澤聞之急召本軍都虞候
王均率兵擒捕延順左執昭壽首右操劒彷徨無所
適卒見均至即與衆推均為帥合曉猛威武兵為亂
牛冕洎轉運使張適奔漢州是秋官兵討平之見雷
有終傳昭壽子承諒娶齊王女嘉興縣主至內殿承
制

論曰五季之亂內則權臣擅命外則藩鎮握兵宋興
內外廓清若天去其疾或納節以備宿衛或請老以
奉朝請雖太祖善御諸臣知機要亦否極而泰之象
也彥卿一門二后累朝襲寵有謀善戰聲振殊俗與
時進退其名將之賢者歟令坤延釗素與太祖親善
平荆湘則南服底定鎮常山則北邊載寧未嘗恃舊
與功以啓嫌隙創業君臣有過人者類如是夫

列傳卷第十

列傳卷第十一

宋史二百五十二

開府儀同三司上柱國錄軍國重事前中書右丞相監修國史領經筵事都總裁臣脫脫等奉

勅修

王景

子廷義

王晏

郭從義

曾孫承祐

李洪信

弟洪義

武行德

楊承信

侯章

王景萊州掖人家世力田景少倜儻善騎射不事生業結里中惡少為群盜梁大將王檀鎮滑臺以景隸麾下與後唐莊宗戰河上檀有功景嘗左右之莊宗

入汴景來降累遷奉聖都虞候清泰末從張敬達圍
晉陽會契丹來援景以所部歸晉祖天福初授相州
刺史范延光據鄆叛屬郡多為所脅從景獨分兵拒
守晉祖嘉之遷耀州團練使及代會晉祖幸鄆留為
京城巡檢使改洺州團練使開運初授侍衛馬軍左
廂都校二年契丹南侵少帝辛澶淵景與高行周等
大破契丹衆于戚城遷侍衛馬軍都指揮使領鄭州
防禦使出為晉州巡檢使知州事拜橫海軍節度契
丹至汴以其黨代景景歸次常山聞契丹主殂廢城
即間道歸鎮斬關而入契丹遁去漢乾祐初加同平

章事會契丹饑幽州民多度關求食至滄州境者五千餘人景善懷撫詔給田處之周祖徵時與景善及即位加兼侍中景起身行伍素無智略然臨政不尚刻削民有訟必面詰之不至大過即諭而釋去不為胥吏所搖由是部民便之廣順初入朝民周環等數百人遮道留之不獲有截景馬鐙者俄以景為護國軍節度歲餘遷鎮鳳翔顯德初封褒國公加開府階世宗即位加兼中書令先是秦鳳陷蜀州旁藩漢戶諸關請收復世宗命景與向拱率兵出大散關進討連陷砦柵遂命景為西面行營都部署大破蜀軍于

上邦斬首數萬級是秋秦州降逾年徙景鎮秦州兼
西面緣邊都部署恭帝即位進封涼國公宋初加守
太保封太原郡王建隆二年春來朝太祖宴賜加等
復以為鳳翔節度西面緣邊都部署四年卒年七十
五贈太傅追封岐王謚元靖初景之奔晉也妻坐戮
二子逃獲免晉祖待之厚賞賜萬計嘗問景所欲對
曰臣自歸國受恩隆厚誠無所欲固問之景稽額再
拜曰臣昔為卒嘗負胡牀從隊長出入屢過官妓俟
小師家意甚慕之今妻被誅誠得小師為妻足矣晉
祖大笑即以小師賜景景甚寵嬖之後累封楚國夫

人侯氏嘗盜景金數百兩私遺舊人景知而不責性
謙退折節下士每朝廷使至雖卑位必降階送迎周
旋盡禮左右或曰王位尊崇無自謙抑景曰人臣重
君命固當如是我惟恐不謙耳初封郡王朝廷以吏
部尚書張昭將命景尤加禮重以萬餘緡遺昭左右
或言其過厚景曰我在行伍間即聞張尚書名今使
於我是朝廷厚我也豈可以往例為限耶景子廷義
廷睿廷訓廷訓至驍衛大將軍致仕廷義起家供奉
官改如京副使以善騎射周世宗擢為虎捷都虞候
遷龍捷右第二軍都校領珍州刺史宋初改內外馬

步軍副都軍頭乾德四年與韓重贊率師護治滑州
靈河新堤六年增治京城又命延義董其役開寶二
年加領橫州團練使從征太原廷義性勇敢親皷士
乘城獨免胄矢中其腦而顛絰宿卒年四十七太祖
甚惜之優詔贈建雄軍節度廷義性驕傲好夸誕每
言我當代王景之子聞者咸笑之因目為王當代

王晏徐州滕人家世力田晏少壯勇無賴嘗率群寇
行政劫梁末徐方大亂屬邑皆為他盜所剽惟晏鄉
里恃晏獲全後唐同光中應募隸禁軍累遷奉國小
校晉開運末與本軍都校趙暉忠衛都校侯章等戍

陝州會契丹至汴遣其將劉愿據陝恣行暴虐晏與
暉等謀曰今契丹南侵天下洶洶英雄豪傑固當乘
時自奮且聞太原劉公威德遠被人心歸服若殺愿
送款河東為天下唱首則取富貴如反掌耳暉等然
之晏乃率敢死士數人夜踰城入府署劫庫兵給其
徒遲明斬愿首縣府門外衆請暉為帥章為本城副
指揮使內外巡檢使兼都虞候遣其子漢倫奉表晉
陽時漢祖雖建號威聲未振得晏等來歸甚喜即日
以暉為保平軍節度章為鎮國軍節度晏為絳州防
禦使仍領舊職既而暉等表晏始謀功為第一遷建

雄軍節度漢祖入汴加同平章事周祖即位加兼侍
中廣順元年劉崇侵晉州晏閉關不出設伏城上并
人以為怯競攀堞而登晏麾伏兵擊之顛死者甚衆
遂焚橋遁遣漢倫追北數十里斬首百餘級擢漢倫
濱州刺史八月來朝周祖以晏家彭城授武寧軍節
度俾榮其鄉里三年周祖征兗州次張康鎮晏來朝
獻馬七匹賜襲衣金帶親郊畢封滕國公加開府階
世宗即位加兼中書令初晏至鎮悉召故時同為盜
者遺以金帛從容置酒語之曰吾鄉素多盜我與諸
君昔嘗為之後來者固當出諸君之下為我告諭令

不復為若不能改吾必盡滅其族由是境內安靜吏
民詣闕舉留請為晏立衣錦碑世宗初復請立德政
碑世宗命比部郎中知制誥張正撰文賜之詔改其
鄉里為使相鄉勲德里私門立戟未幾改河南尹西
京留守顯德三年移鳳翔節度六年從世宗北征為
益津關一路馬軍都部署韓令坤副焉遂平三關太
祖即位進封趙國公從征李筠師還改安遠軍節度
乾德元年進封韓國公上章請老拜太子太師致仕
每朝會令綴中書門下班俄歸洛陽別墅四年冬卒
年七十七廢朝三日贈中書令初晏為軍校與平陸

人王興善其妻亦相為嫌怨晏既貴乃薄興興不能平晏妻病興語人曰吾能治之晏遽訪興興曰我非能醫但以公在陝時止一妻今妓妾甚衆得非待糟糠之薄致夫人怏怏成疾耶若能斥去女侍夫人之疾可立愈晏以為謗已乃誣以他事悉案誅其夫妻守西洛日白重贊鎮河陽時世宗征淮南重贊慮弁人乘間為寇因葺城壘且約晏為援晏意欲兼有三城即與漢倫同率兵赴之重贊聞其來拒不納遣人語之曰公在陝州已立大功河陽小城不煩枉駕慙不能對遂引兵還

郭從義其先沙陀部人父紹古事後唐武皇忠謹特見信任賜姓李氏紹古卒從義繼斗角莊宗畜於宮中與諸子齒明宗與紹古同事武皇情好款狎即位以從義補內職累遷內園使晉天福初始復姓郭氏坐事出為宿州團練副使丁內艱北歸遂家太原漢祖在鎮表為馬步軍都虞候屢率師破契丹于代北及建大號從義首贊其謀擢鄭州防禦使充東南道行營都虞候領首軍自太行路渡河漢祖入汴以為河北都巡檢使杜重威據大名叛以為行營諸軍都虞候重威降為鎮寧軍節度趙思綰之叛為行營都

部署賜戎裝器仗金帶帥至永興圍其城即以從義為永興軍節度思綰糧盡城中人相食從義繫書矢上射入城中說思綰令降仍表於朝廷許以華州節制隱帝從其計即遣使諭思綰思綰開門納款翊日從義具軍容入城憲候館中思綰入謁即令武士執之并其黨三百餘人悉斬於市以功加同平章事周廣順初加兼侍中移鎮許州顯德初親郊加檢校太師世宗將征劉崇從義適來朝因請扈從世宗甚悅改天平軍節度即令從符彥卿破契丹于忻口師還以功加兼中書令四年從征淮南移鎮徐州及世宗

自迎鑾至泗州見於行在恭帝即位加開府階宋初
加守中書令太祖征揚州從義迎謁於路顧扈從不
允乾德二年又為河中尹護國軍節度六年以疾歸
京師開寶二年改左金吾衛上將軍逾年上章請老
拜太子太師致仕四年卒年六十三贈中書令從義
性重厚有謀略多技藝尤善飛白書初思綰之叛也
巡檢使喬守溫遁去姬妾悉入思綰思綰敗從義盡
取之守溫詣從義求其愛妾雖不敢拒而心銜焉遂
發守溫逃遁事坐棄市人皆冤之從義善擊毬嘗侍
太祖於便殿命擊之從義易衣跨驥馳驟殿庭周旋

擊拂曲盡其妙既罷上賜坐謂之曰卿技固精矣然
非將相所為從義大慙子守忠守信守忠至閑廄副
使守信字寶臣頗知書與士大夫游至東上閣門使
知邢州卒子世隆為比部員外郎世隆子昭祐承祐
昭祐為閣門祗候

承祐字天錫娶舒王元偁女授西頭供奉官仁宗為
皇太子承祐補左清道率府率春坊左謁者真宗為
玉石小牌二勒銘以戒飭之帝即位遷西染院副使
兼閭道通事舍人勾當翰林司遷西上閣門副使坐
盜御酒及用尚方金器除名岳州編管徙許州別駕

起為率府率遷西京作坊使勾當右驥驥院院之大
校試路馬者前鳴鞭擁御蓋承祐代試之其狂僭如
此進六宅使象州團練使承祐性狡猾緣東宮恩又
憑藉王邸親既廢復用廼僭言事或指切人過失同
列謂之武諫官真授衛州刺史知相州入為群牧副
使改瀛州團練使歷知曹鄭澶鄆貝州徙澶州兵馬
總管役卒有異謀者廉得不待奏捕斬之再知澶州
會中使過遽延入問管軍闕補何人使者曰聞朝廷
方擇才武者承祐起挽彊自銜左右皆笑入為龍神
衛四廂都指揮使以父喪起復真定府定州等路副

都總管諫官歐陽脩余靖論其非才改知相州尋徙
大名府副都總管樞密使杜衍惡承祐驕恣奏罷軍
權為相州觀察使永興軍副都總管改知邢州徙河
陽兵馬總管衍去位復進為殿前都虞候并代州副
都總管兼知代州徙邢州諫官錢明逸言承祐無廉
守邢民素厭苦之改相州徙秦鳳路副總管累遷建
武軍節度使殿前副都指揮使尋以宣徽南院使判
應天府府壁壘不完盜至卒無以禦承祐始城南關
浚沙濱盟三河徙亳州諫官言承祐在應天府給糧
不以次且擅留糧綱批宣頭不發戍還兵越法杖配

輕罪借用翰林器出入擁旗槍以禁兵擬周衛體涉
狂僭無人臣禮罷宣徽南院使許州都總管徙節保
靜軍知許州轉運使蘇舜元薦承祐有將帥才政事
如龔黃帝謂輔臣曰彼庸人監司乃龔黃比之何所
取信哉改知鄭州未行暴疾卒贈太尉謚曰密承祐
所至多興作為煩擾百姓苦之

李洪信并州晉陽人漢昭聖太后弟也后第六人洪
信居長少善騎射後唐明宗在藩時隸帳下及即位
愛將朱弘實總領捧聖軍弘實擢洪信為爪牙漸遷
小校應順中潞王舉兵少帝殺弘實而東奔捧聖軍

數百騎從行洪信預焉及次衛州少帝與晉高祖遇
因有疑貳謀害晉祖其從兵皆亂時漢祖方護晉祖
洪信以兵應之獲免清泰中又為雍王重羨牙校晉
初為興順左廂都指揮使漢祖統禁軍遷鎮太原奏
隸麾下漢祖領陳州刺史左護聖左廂都指揮使俄
加岳州防禦使從漢祖降鄴以警扈之勞授侍衛馬
軍都指揮使領武信軍節度乾祐中以群小用事心
懷憂懼白太后求解軍職出為鎮寧軍節度歲餘遷
保義軍節度初楊邠以元從功臣為方鎮者不諳政
務令三司擇軍將分補諸鎮都押牙孔目官或恃以

朝選藩帥難制洪信聞內難即召馬步軍都校聶召
奉國軍校楊德王建黃全武楊進翟本右牙都校任
溫武德護聖都校康審澄及判官路濤掌書記張洞
都押牙楊昭勍孔目官魏守恭悉殺之誣奏謀逆周
廣順初加同平章事洪信常以此妄殺自歎及革命
內不自安周祖猶以漢太后之故移鎮京兆本城兵
不滿千王峻西征至陝州以援晉州為辭又取去數
百人及劉崇北遁遣禁兵千餘屯京兆洪信益懼即
請入朝懇辭藩鎮拜左武衛上將軍世宗即位遷左
驍衛上將軍顯德五年改右龍武軍統軍從世宗北

征為合流口部署乾德五年改左驍衛上將軍開寶
五年請老以本官致仕八年卒年七十四洪信無他
才術徒以外戚致位將相歛財累鉅萬而吝嗇尤甚
時節鎮皆廣置帳下親兵惟洪信最寡少弟洪義
洪義本名洪威避周祖名改焉漢祖鎮太原補親校
開國授護聖左廂都校領岳州防禦使遷侍衛馬軍
都指揮使領武信軍節度少帝即位改鎮寧軍節度
會誅楊邠史弘肇等時侍衛步軍都指揮使王殷屯
澶州即遣供奉官孟業賚密詔令洪義殺之又令護
聖都指揮使郭崇等害周祖於鄴洪義素怯懦慮殷

覺遷延不敢發遽引業見殷殷乃錮業送密詔於周祖洎周祖起兵少帝又詔洪義扼河橋及周祖兵至洪義就降漢室之亡由洪義也廣聖初權知宋州節度未幾真拜歸德軍節度加同平章事權知許州歲餘改鎮安州顯德初加檢校太師世宗即位加兼侍中未幾徙青州六年夏遷京兆尹永興軍節度恭帝嗣位加開府階宋初加兼中書令移鄆州乾德五年代歸卒年五十九贈太師

武行德并州榆次人身長九尺餘材貌奇偉家甚貧常採樵鬻之自給晉祖鎮并門暇日從禽郊外值行

德負薪趨拱於道左晉祖見其魁岸又所負薪異常
令力士更舉之俱不能舉頗奇之因留帳下晉天福
初授奉國都頭遷指揮使改控鶴指揮使寧國軍都
虞候開運中契丹至汴行德被獲乃偽請於契丹以
自效契丹信之方具舟數十艘載鎧甲令行德率將
校軍卒送歸其國泝汴至河陰行德謂諸將曰我輩
受國厚恩而受制於契丹與其離鄉并投邊塞為異
域之鬼曷若與諸君驅逐兒黨共守河陽姑俟契丹
兵退視天命所屬歸之建功業定禍亂以圖富貴可
乎衆素服行德威名皆曰所向惟命不敢愛死行德

即殺契丹監使分授器甲由汜水倍道抵河陽契丹
節度使崔廷勲出兵來拒行德麾衆逆擊自旦及午
殊死戰廷勲大敗棄城走行德遂據河陽盡以府庫
分給將士因推行德知州事時契丹兵尚充斥行德
厲士卒繕甲兵據上游士氣益奮人望歸之聞漢祖
起太原即自稱河陽都部署遣其弟行友間道奉表
勸進漢祖覽奏喜甚即授行德河陽三城節度漢祖
由晉絳至洛行德迎候境上以所部兵翼至京師還
順初加兼侍中俄改忠武軍節度遷河南尹西京留
河陽乾祐中加同平章事移真定尹成德軍節度廣

守時禁鹽入城犯者法至死告者給厚賞洛陽民家
姬將入城鬻蔬俄有僧從姬買蔬就筥翻視密寘鹽
筥中少答其直不買而去姬持入城抱關者搜得鹽
擒以詣府行德見盛鹽襍非村姬所有疑而詰之姬
言適有僧自城外買蔬取視久之而去即捕僧訊治
之具伏與關吏同誣姬以希賞行德釋姬斬僧及抱
關吏數輩人畏之若神明部下凜然三年丁外艱起
復顯德初加開府階進封譙國公世宗即位兼中書
令初世宗自河東還次河陽以洛陽城頭缺令葺之
行德率部民萬餘完其城封邢國公是秋代王晏爲

武寧軍節度與晏兩換其任先是唐末楊氏據淮甸
自角橋東南決汴匯為汎澤二年將議南征遣行德
率所部丁壯於古隄疏導之東達于泗上及親征以
行德為濠州行營都部署破淮軍二千餘人於郡境
俄遣率師屯定遠以逼其城為吳人所敗死者數百
人行德以身免左授右衛上將軍五年下淮南復授
行德保大軍節度兼中書令恭帝嗣位進封宋國公
宋初加中書令進封韓國公再授忠武軍節度改封
魏國公乾德二年冬移鎮安州加開府儀同三司開
寶二年入為太子太傅太平興國三年以本官致仕

四年卒年七十二贈太師

楊承信字守真其先沙陀部人父光遠仕晉至太師
壽王承信光遠第三子幼以父任自義武軍節院使
領蘭州刺史歷宣武平盧二軍牙校開運初光遠以
青州叛少帝遣李守貞等討之食盡勢窮承信兄承
勲劫其父以降青州平光遠死承信與弟承祚詣闕
請死詔釋之以承信為右羽林將軍承祚為右驍衛
將軍放歸服喪私第尋安置鄭州初光遠送款契丹
求援兵未至而光遠降及契丹來寇承勲時為鄭州
防禦使召數其罪殺之以承信為平盧軍節度繼父

職仕漢歷安鄆二州節度累加檢校太師周廣順初
加同平章事諸將西討劉崇承信表求預行以郊祀
恩加開府階封杞國公世宗即位進韓國公顯德初
征淮南為濠州攻城副都部署改壽州北砦都部署
兼知行府事壽州平累戰功擢忠正軍節度同平章
事時徙州治下蔡承信既增廣其城又遣監軍薛友
柔敗淮人六百餘于廬州比恭帝即位進封魯國公
宋初加兼侍中來朝會征李筠命為澤州西面都部
署筠平移鎮河中乾德元年進封趙國公二年卒年
四十四贈中書令承信身長八尺美儀表善持論且

多藝能雖叛臣之子然累歷藩鎮刻勵為政而不苟故能始終富貴其卒也蒲民表乞祠之則其遺愛之在人者可知矣景德四年錄其孫松為奉職侯章弁州榆次人初在弁門事後唐莊宗為隊長明宗朝遷小校晉開運末為忠衛指揮使屯兵陝州為内外馬步軍都指揮使兼三城巡檢使會契丹入中原與趙暉王晏謀斬契丹將劉愿送款於漢祖漢祖入汴擢為鎮國軍節度乾祐初加同平章事尋移鎮邠州章居鎮無善政傲上剥下以貪猥聞用見戶為逃擅其租賦乃矯奏貧民數千戶負稅租久禁繫不

能輸願以己奉代時方姑息詔褒之副使趙彥鐸有
良馬章欲之不與誣彥鐸謀逆殺之亦置而不問俄
加檢校太師周初加兼侍中廣順二年入朝獻銀帛
請開宴周祖謂左右曰諸侯來朝天子自當錫宴以
申愷樂豈俟其貢奉為之耶命復賜之仍令有司自
今藩鎮有進奉者勿受俄賜宴廣政殿章又獻銀千
兩馬七匹上壽復不納三年授鄧州節度周祖親郊
加開府階封申國公世宗即位加兼中書令世宗親
征壽陽命章為攻城水砦都部署右衛大將軍王璨
副之俄徙西北水砦都部署再為武勝軍節度建隆

元年八月授太子太師封楚國公既罷節鎮居常快
快一日於朝堂與故舊言晉漢間事時有輕忽章者
章厲聲曰當遼主疾作謀歸有上書請避暑嵩山者
我麤人以戰鬪取富貴若此諛佞未嘗為之坐中有
慚者乾德五年卒

論曰王景輩微時或至為盜負薪遭五代之亂奮身
戎功重據邊要宋興稽頽北嚮太祖待以誠信宜無
不自安者景趨利改圖乃至滅族王晏郭從義遷怒
肆忿誣人以死侯章在藩邸有剥下之名李洪義狃
於肺腑之戚而無外凜之志咎孰甚焉斯皆亂世之

習有不能盡去之者武行德守洛邑辯究欺罔民用
畏服顧不優於諸人耶

列傳卷第十一

安道雨不覺你疑人取
首肯不觉益去首肯不覺

列傳卷第十二

宋史二百五十三

開儀同三司上贊錄軍國重事前書表奏相襲授國史領經筵事都繼義張曉等奉

勅修

折德扆

子御勲御卿
曾孫克行

馮繼業

王承羨

李繼周

孫行友

子全照

折德扆世居雲中為大族父從阮自晉漢以來獨據府州控扼西北中國賴之仕周至靜難軍節度使其鎮府州時署德扆為馬步軍都校廣順間周世宗建府州為永安軍以德扆為節度使時從阮鎮邠寧父子俱領節鎮時人榮之顯德中德扆率師攻下河市

鎮斬弁軍五百餘級入朝以其弟德愿權總州事時世宗南征還次通許橋德衆迎謁且請遷内地世宗以其素得蕃情不許厚加賜賚而遣之德衆未至德愿又破弁軍五百餘于沙谷砦斬其將郝章張釗宋初德衆又破河東沙谷砦斬首五百級建隆二年來朝待遇有加遣歸鎮乾德元年敗太原軍于城下擒其將楊璘二年卒年四十八贈侍中子御勲御卿

御勲字世隆德衆鎮府州日表為右職德衆卒以御勲領汾州團練使權知府州事開寶二年太祖征太原御勲詣行在謁見以為永安軍留後四年以郊祀

來朝禮畢歸鎮九年郊祀西洛復來朝道病後期改
泰寧軍節度使留京師太平興國二年卒年四十贈
侍中

御卿幼補節院使御勲知州事署為兵馬都校御勲
徙鎮召為閑廄副使知府州太宗征河東命御卿與
尹憲領屯兵同攻嵐州又破岢嵐軍擒其軍使折令
圖以獻遂下嵐州又殺其憲州刺史霍翊又擒其將
馬延忠等七人遷崇儀使淳化三年凡四遷而為府
州觀察使五年拜永安軍節度使既而契丹衆萬餘
入寇御卿大敗之於子河议斬首五千級獲馬千匹

契丹將號突厥太尉司徒舍利死者二十餘人擒其
吐渾一人自是契丹知所畏太宗因遣使問御卿曰
西北要害皆屯勁兵戎人何自而至御卿對曰敵緣
山峽小徑入謀剽略臣謀知之遣人邀其歸路因縱
兵大擊敗走之人馬墜崖谷死者相枕其大將韓德
威僅以身免皆聖靈所及非臣之功也上嘉之歲餘
御卿被病德威謀知之且為李繼遷所誘率衆來侵
以報于河汎之役御卿力疾出戰德威聞其至不敢
進會疾甚其母密遣人召歸御卿曰世受國恩邊寇
未滅御卿罪也今臨敵棄士卒自便不可死於軍中

乃其分也為白太夫人無念我忠孝豈兩全言訖泣
下翊日卒年三十八上聞悼惜久之贈侍中以其子
惟正為洛苑使知州事惟正歸朝以其弟惟昌繼之
咸平二年河西黃女族長蒙異保及惟昌所部啜訛
引趙保吉之衆入寇麟州萬戶谷進至松花砦惟昌
與從叔同巡檢使海超第供奉官惟信率兵赴戰會
保吉兵衆官軍不敵惟昌臂中流矢墜馬攝弓起得
裨將馬突圍出海超惟信沒焉九月保吉黨萬私保
移埋復來寇惟昌與宋思恭劉文質合戰于埋斧峯
敗走之又破言泥族拔黃砦焚其器甲車帳俘斬甚

衆以功領富州刺史改文思使景德元年與王萬海等破賊砦護芻糧抵麟州秋入朔州界破狼水砦時契丹方圍岢嵐軍聞敗遁去明年拜興州刺史大中祥符二年表求赴闕真宗命近臣與射於苑中宴賜甚厚上言先臣御卿蒙賜旗三十竿以壯軍容請別給賜許之七年命河東民運糧赴麟州當出兵為援惟昌力疾領步騎屯寧遠砦冒風沙而行時疾已亟猶與賓佐宴飲談笑自若焉明日卒年三十七以其弟惟忠繼之惟忠字盡臣初以兄惟信戰沒補西頭供奉官擢閤門祗候及惟昌卒以惟忠為六宅使知

府州兼麟府路都巡檢使領普州刺史再遷左藏庫
使真拜嘉州刺史改資州進簡州團練使喪母起復
雲麾將軍卒惟忠知兵事天聖中契丹與夏國會兵
境上聲言嫁娶惟忠覘得其實率麾下徃備之戒士
卒毋輕動一夕風霾有騎走營中以為寇至惟忠堅
卧不動徐命擒之得數誕馬蓋虜所縱也既卒錄其
弟姪子孫七人以其子繼宣嗣州事又之特贈惟忠
耀州觀察使寶元中繼宣坐苛虐掊刻種落嗟怨紕
為左監門衛將軍楚州都監擢其弟右侍禁繼閔為
西京作坊使嗣州事繼閔字廣孝慶曆中元昊兵攻

麟州不克進圍州城城險且堅東南有水門厓壁峭絕阻河賊緣厓腹微徑魚貫而前城中矢石亂下賊轉攻城北士卒復力戰賊死傷甚衆遂引去圍豐州豐州遂陷繼閔以城守勞特遷官苑使普州刺史未幾護送麟州戍卒冬服賊伏兵邀擊之盡掠所齎繼閔脫身繇間道歸會赦止奪官苑使後復官領果州團練使自元昊反繼閔招輯歸業者三千餘户皇祐二年卒以其弟繼祖嗣州事繼祖字應之由右侍禁遷西染院使累轉皇城使成州團練使臨政二十餘年奏乞書籍仁宗賜以九經韓絳發河東兵城囉元

繼祖為先鋒深入敵帳降部落戶八百加解州防禦使卒繼祖有子當襲州事請以授兄之子克柔詔從之而進其三子官錄二孫為借職弟繼世少從軍為延州東路巡檢嵬名山之內附繼世先知之遣其子克懃報种諤諤用是取綏州繼世以騎步萬軍于懷寧砦入晉祠谷徃銀川分名山之衆萬五千户居於大理河夏人來攻再戰皆捷諤抵罪逮繫獄以兵付之而行遂同名山守綏州錄功領忠州刺史說韓絳城囉兀以撫橫山因畫取河南之策絳以為然以左駢驥使果州團練使卒諸司使無賄禮詔以繼世蕃

官捍邊有績特給之從子克行

克行字遵道繼閔子也初仕軍府無所知名夏人寇
環慶種谔拒之詔河東出師為援克行請往谔使以
兵三千護餉道戰于葭蘆川先登斬級四百降戶千
馬畜萬計諸老將瞿然曰真折太尉子也擢知府州
秦兵討夏國張世矩將河外軍民克行與俱廷議謂
守臣難自行詔克行選兵隸世矩克行抗章願率部
落先驅未報即委管鑰而西大酋咩保吳良以萬騎
來躡克行為後拒度賊半度隘縱擊大破之殺咩保
吳良師還自効釋不問王中正出塞克行先拔宥州

每出必勝夏人畏之益左廂兵專以當折氏太原孫
覽議城葭蘆諸將論多不合召克行問策即頓兵吐
渾河約勒部伍為深入窮討之狀敵疑不敢動既訖
役又入津慶龍橫川斬級三千詔河東進築八砦通
道鄜延延帥遣秦希甫來共議克行請兩路併力以
遠者為先希甫曰由近及遠法也克行曰不然事有
奇正今乘士氣之銳所利在速故先遠役以出其不
意若徐圖之士心且怠矣希甫持不可并上二議卒
用克行策城成謀言寇至軍中皆戒嚴克行止之曰
彼自擾耳已而果然克行在邊三十年善拊士卒戰

功最多羌人呼為折家父官至秦州觀察使卒贈武
安軍節度使子可大為榮州團練使知府州從子可
適可適未冠有勇馳射不習而能鄜延郭達見之歎
曰真將種也薦試廷中補殿侍隸延州從种謌出塞
遇敵馬以少年易之可適索與鬪斬其首取馬而還
益知名米脂之役與夏人戰三角嶺得級多又敗之
於蒲桃谷東兵久不得食千人成聚籍籍于軍門或
欲掩殺以為功可適曰此以饑而逃耳非叛也單馬
出詰之曰爾輩何至是不為父母妻子念而甘心為
異域鬼耶皆回面聲喏流涕謝再生各遣歸羌夏人

十萬入寇可適先得其守烽卒姓名詐為首領行視呼出盡斬之烽不傳因卷甲疾趨大破之于尾丁磧回次煙楊溝正午駐營分騎據西山曰彼若躡吾後腹背受敵必敗果舉軍來可適所部纔八千轉戰至高嶺迺從間道趣洪德設伏邀其歸路敵至伏發衝之其國母踰山而遁焚棄輜重雖惟帳首飾之屬亦不返衆相蹈藉赴厓澗死者如積論前後功至皇城使成州團練使知岷蘭州鎮戎軍渭帥章榮合熙秦慶三道兵築好水川命總管王文振統之而可適將軍為副熙州兵千人失道盡死文振歸罪於可適案

即下之吏宰相章惇欲按軍法哲宗不許猶削十三
官而罷蔡請留以責效乃以權第十二將嵬名阿埋
昧勒都逋皆夏人桀黠用事者詔可適密圖之會二
酋以畜牧為名會境上可適謀知之遣兵夜往襲并
俘其族屬三千人遂取天都山帝為御文德殿受賀
以其地為西安州遷可適東上閭門使洛州防禦使
涇原鈴轄知州事真拜和州防禦使進明州觀察使
為副都總管帥鍾傳行邊為敵所隔以輕騎拔之得
歸傳議取靈武環慶亦請出師命可適將萬騎往即
薄靈州川夏人扶老挾稚中夜入州城明日俘獲甚

夥而慶兵不至乃引還詔使入覲帝以傅策訪焉對曰得之易守之難當先侵弱其地待吾藩籬既固然後可圖帝曰卿言是也進武安軍節度觀察留後步軍都虞候大城蕭關與傅議齟齬會覆師數百于踏口傅劾之貶鄭州觀察使俄知衛州拜淮康軍節度使轉運使請於平夏通峽鎮戎西安四砦分築塲圃置芻粟五百萬可適以費大難之又欲借車牛以運及致十萬斛於熙河皆矣其意乃中以疑謗召為佑神觀使明年復以為渭州命其子彥質直祕閣參軍事數月而卒年六十一年質紹興中簽書樞密院別

有傳

馮繼業字嗣宗大名人父暉朔方節度封衛王繼業幼敏慧有度量以父任補朔方軍節院使隨父歷邠孟及再領朔方皆補牙職周廣順初暉疾繼業圖殺其兄繼勲暉卒遂代其父為朔方軍留後以郊祀恩加靈州大都督府長史遷朔方節度靈環觀察處置度支溫池榷稅等使恭帝時繼業既殺兄代父領鎮頗驕恣時出兵劫畧羌夷羌夷不附又撫士卒少恩繼業慮其為變以太祖居鎮日嘗得給事乃豫徙其孥關下建隆初來朝連以駝馬寶器為獻開寶二年

賜詔獎諭拜靜難軍節度使三年改鎮定國軍吏民立碑頌其遺愛太平興國初來朝封梁國公留京師明年卒年五十一贈侍中

王承羨豐州人本河西藏才族都首領其父事契丹為左千牛衛將軍開寶二年率衆來歸承羨授豐州牙內指揮使父卒改天德軍蕃漢都指揮使知州事移豐州刺史遣軍校詣闕言願誘退渾突厥內附上嘉其意太平興國七年與契丹戰斬獲以萬計禽其天德軍節度使韋太以獻明年契丹來寇又擊敗其衆萬餘追北至青冢百餘里斬獲益衆以功授本州

團練使以乞黨族次首領弗香克浪買為歸德郎將
沒細大首領越移為懷化大將軍瓦窯為歸德大將
軍淳化二年冬來朝今歸所部控子河以自是諸蕃
歲修貢禮頗效忠順景德初來朝以其守邊歲久遷
本州防禦使以還自承羨內屬給奉同蕃官例至是
特詔月增五萬尋請於州城置孔子廟詔可之未幾
被疾遣中使挾醫視之大中祥符五年卒贈恩州觀
察使六年錄其子文寶孫懷筠以官初承羨養其長
孫文玉為子奏署殿直又卒其本族首領上言文玉
曉達軍政請令襲承羨任下蕃漢議議同以為侍禁

知州事文玉父文恭時為侍禁在沂州表訴其事詔
改文恭為供奉官九年承美葬詔以緡帛米麴羊酒
賜其家

李繼周延州金明人祖計都父孝順皆為金明鎮使
繼周嗣掌本族太平興國三年東山蕃落集衆寇清
化砦繼周率衆敗之殺三千餘人補殿前承旨雍熙
中又與侯延廣敗未藏末腋等族於渾州西山淳化
四年遷殿直賜介胄戎器茶綠明年討李繼遷命開
治塞門鴉兒兩路又招降族帳首領二十餘人率所
部入夏州敗蕃兵數千於石堡砦以功轉供奉官復

加恩賞仍賜官第繼周以阿都關塞門盧關等砦最居邊要遂規修築砦城有磨盧家媚咩拽歲等族居近盧關未嘗內順繼周夜率所部往襲焚之斬首俘獲甚衆至道二年授西京作坊副使賜袍帶銀綠雕戈以寵之大軍討西夏命為延州路踏白先鋒會繼遷邀戰於路繼周戰却之咸平初改西京左藏庫副使三年復為先鋒入賊境焚積聚殺人畜獲器甲凡六十餘萬授供備庫使領金明縣兵馬都監新砦解家河盧關路都巡檢五年授西京作坊使蕃騎入鈔繼周遂之出境景德元年夏人圍麟州繼周受詔率

兵會李繼福掩擊之加領誠州刺史大中祥符二年
卒年六十七詔邊臣擇其子可襲職者以名聞邊臣
言其子殿直士彬遜悞從子士用朴忠練邊事且為
部落所伏乃詔士彬管勾部族事士用為巡檢都監
以左右之士彬後至供備庫副使金明縣都監新砦
解家河盧關路巡檢康定元年元昊反攻保安軍而
潛兵襲金明士彬父子俱被禽士彬兄士紹至內殿
崇班士用至供奉官閣門祗候李繼福者亦與繼周
同時歸順授永平砦茭村軍主以戰功歷歸德將軍
領順州刺史至內殿崇班新歸明諸族都巡檢

孫行友莫州清苑人世業農初定州西二百里有狼山者當易州中路舊有城堡邊人賴之以避寇山中蘭若有尼姓孫氏名深意有術惑衆行友兄子方諫名之為姑師事之甚謹及尼坐亡行友益神其事因以其術然香燈聚民漸衆自晉少帝與契丹絕好邊州困於轉輸逋民往往依方諫推以為帥方諫懼主帥捕逐乃表歸朝因署為東北西招收指揮使且賜院額曰勝福每契丹軍來必率其徒襲擊之鎧仗畜產所得漸多人益依以避難焉易定帥聞于朝因以方諫為邊界遊奕使行友副之自是捍禦侵軼多所

殺獲乘勝入祁溝關平庸城破飛狐砦契丹頗畏之
邊民千餘家賴以無患然亦陰持兩端以圖自固已
而晉師失律薊人導契丹陷中原方諫之密搆也契
丹授方諫定州節度行友易州刺史尋以蕃將耶律
忠代方諫於雲州方諫不受命歸保狼山契丹北歸
焚劫中山方諫自狼山率衆復保定州歸命於漢授
行友易州刺史行義泰州刺史弟兄掎角以居寇每
入諸軍鎮閉壘坐視一無所得行友嘗遣都校王友
遇巡警於石河與契丹遇殺百餘騎又嘗獲其刺史
蔡福順清苑令王璉乾祐中契丹復犯塞行友禦之

俘殺數百人周太祖北征行友道獻俘馘人馬以求見且請自效迺厚加賜予留之軍門及周祖受命行友屢上言偵得契丹離合願得勁兵三千乘間平定幽州乃移方諫鎮華州以行友為定州留後顯德初正授節鉞世宗自河東還加檢校太傅六年世宗北征行友攻下契丹之易州擒其刺史任欽以獻宋初加同平章事狼山佛舍妖妄愈甚衆趨之不可禁行友不自安累表乞解官歸山詔不允建隆二年乃徙都監藥繼能密表其事太祖遣閣門副使武懷節馳

騎會鎮趙之兵稱巡邊直入其城行友不之覺既而出詔示之令舉族赴闕行友蒼黃聽命既至命侍御史李維岳就第鞫之得實下詔切責削奪從前官爵勒歸私第仍戮其部下數人遣使馳詣狼山輦其屍師之屍焚之行友弟易州刺史方進兄子保塞軍使全暉皆詣闕待罪詔釋之四年秋詔免行友禁錮未幾以郊祀恩起為右龍武軍將軍乾德二年遷右監門衛大將軍又改左龍武軍大將軍太平興國六年卒年八十贈左衛上將軍方進至德州刺史子全照全照字繼明以蔭補殿直雍熙中授京南巡檢俄隸

幽州部署曹彬麾下遷供奉官閤門祗候歷靜戎威
虜二軍監軍從田重進擊賊有功就加西京作坊使
無知威虜軍連為廣韶鄜延二路都巡檢使淳化五
年率兵與李繼隆克綏州因與張崇貴等同戍守之
俄護屯兵於夏州無知州事召還為登萊路都巡檢
使遷左藏庫使延州監軍兼阿都闢盧關路都巡檢
事咸平初入掌軍頭引見司二年加如京使為涇原
路鉉轄兼安撫都監是冬徙并汾等州都巡檢使三
年改知順安軍代還復為環慶路鉉轄與李繼和規
度靈州道路四年加西上閤門使復為環慶路鉉轄

五年將城綏州以慕興為綏州路部署全照為鉞轄既又慮全照素剛執與興不協乃以曹璡代之既調兵夫二萬餘全照言其非便乃罷又嘗命度地河北全照言沿河高阜可分置城堡屯戍者寧邊軍南武強縣側凡二處上重於興役止命營安平南徙置祁州俄知天雄軍府六年夏上裁定防秋禦戎之要命為平邊軍部署領兵八千扼要害之路以全照好陵人取其嘗所保薦者王德鈞裴自榮共事焉景德元年上辛澶淵命為駕前西面邢洺路馬步軍鉞轄兼天雄軍駐泊兼管勾東南貝冀等州鉞轄全照言若

敵騎南逼魏城但得騎兵千百必能設奇取勝上賞其忠果乃傳詔都部署周瑩若全照欲擊賊即分兵給之既而邊騎果逼府城全照拒退之真宗遣使勞慰時契丹請和朝廷遣曹利用就其行帳議事全照疑非誠懇勸判府王欽若留不遣故德清軍不能守吏民多為賊所害及契丹出境北面將帥還師併至府城全照令以次雙行入門魏能不從其約率兵馬全入全照坐城樓引弓射之欽若入朝就命全照知軍府事以城守勞加檢校工部尚書增食邑三百戶徙鎮州召還進東上閣門使領英州刺史全照形短

精悍知兵以嚴毅整衆然性剛使氣專任刑罰中書
初進擬嚴州刺史上曰全照深刻常慮人以嚴察議
已今授此州似涉譏诮乃改焉三年為邠寧環慶都
部署趙德明納款朝議減西鄙戍兵令屯近地全照
以邊防不可無備未即奉詔上曰全照是好勇多言
者德明使已至闕復何慮焉因徙全照知永興軍府
仍拜四方館使西師移屯者至府命全照兼駐泊鈐
轄全照許州有別墅求典是州可之大中祥符中遷
引進使踰歲表求歸朝命掌閣門客省四方館事四
年車駕西幸留為新城都巡檢未幾卒年六十

論曰五代之季邊圉之不靖也久矣太祖之興雖不勤遠略而向之陸梁跋扈而不可制者莫不竭忠效節雖奔走僵仆而不避豈人心之有異哉良由威德之並用控御之有道也折氏據有谷府與李彝興之居夏州初無以異太祖嘉其嚮化許以世襲雖不無世卿之嫌自從阮而下繼生名將世篤忠貞足為西北之捍可謂無負於宋者矣承美繼周分涖種落亦能世其職者也繼業雖出戦叛之族而有循良之風方諫行友介遼晉間持兩端以取將相終以首鼠獲咎其諸異端之害歟全照職親禁衛素稱嚴果而昧

於弭兵之利君子所不予以也

列傳卷第十二